

四庫全書

子部

欽定四庫全書

子部

冊府元龜卷

三十八至
四十

詳校官中書臣瞿 照

員外郎臣牛稔文覆勘

總校官庶吉士臣何思鈞

校對官中書臣鮑之鍾

謄錄監生臣黃 鑫

欽定四庫全書

冊府元龜卷三十八

宋

王欽若等撰

帝王部

尊親

尊師

尊乳母

尊親

仲尼曰故雖天子必有尊也孟軻亦曰孝子之至莫大乎尊親夫自家刑國父天母地正位凝命總治綱紀巍乎在上風以化下鞠育之重經義攸著于以樹崇名殊

徽號異宮室之制申朝覲之禮增飾服用嚴備官屬晨夕奉養罄竭恭愛德教彌遠兆庶是賴書稱一人有慶者無善於此矣

虞舜踐帝位載天子旗往朝父瞽瞍

漢高帝六年三月帝歸櫟陽五日一朝太公太公家令說太公曰天無二日土無二王皇帝雖子人主也太公雖父人臣也奈何令人主拜人臣如此則威重不行後帝朝太公擁篲

為恭也如今
卒持帚者也

迎門卻行

卻退而
行也

帝大驚

下扶太公太公曰帝人主奈何以我亂天下法於是帝心

善家令言

善其發悟已心因得尊崇
父號非善其令父敬已

賜黃金五百斤五月

丙午詔曰人之至親莫親於父子故父有天下傳歸於

子子有天下尊歸於父此人道之極也前日天下大亂

兵革並起萬民苦殃朕親被堅執銳

被堅謂甲冑也
執銳謂利兵也

自

帥士卒犯危難平暴亂立諸侯偃兵息民天下大安此

皆太公之教訓也諸王通侯將軍羣卿大夫已尊朕為

皇帝而太公未有號今上尊太公曰太上皇

太上極尊
之稱也皇

君也天子之父故號曰皇不預治國故不言帝臣欽若等曰太上皇號始於此

惠帝高祖十二年五月丙寅即位尊母呂皇后曰皇太后

文帝初封代王十七年高后喪大臣議立後疾外家呂氏彊暴皆稱薄氏仁善故迎立代王為皇帝尊母薄太后為皇太后

景帝即位尊母竇皇后為皇太后

武帝即位尊竇太后曰太皇太后母王皇后為皇太后

臣欽若等曰漢因秦之稱號帝
母稱皇太后祖母稱太皇太后

昌邑王即位尊昭帝皇后上官氏為皇太后

元帝即位尊皇太后曰太皇太后

上官后也

皇母曰皇太后

邛成王皇后母
養元帝者也

成帝即位尊皇太后曰太皇太后母王皇后曰皇太后

哀帝即位尊皇太后曰太皇太后成帝趙后曰皇太后

太皇太后下詔尊定陶恭王為恭皇哀帝因是曰春秋
母以子貴尊傅太后為恭皇太后丁姬為恭皇后各置

左右詹事食邑如長信宮

建平二年夏四月詔曰漢家之制推親親以顯尊尊

天子

之至親當極尊號

定陶恭皇之號不宜復稱定陶尊恭皇太后

曰帝太后稱永信宮恭皇后曰帝太后稱中安宮成
帝母太皇太后本稱長信宮成帝趙后為皇太后並四
太后各置少太僕秩皆中二千石

平帝中山孝王子也元壽二年即位元始元年六月使

少府左將軍豐

豐既豐也

賜帝母中山孝王姬衛氏璽書拜

為中山孝王后孺子嬰立尊平帝王皇后為皇太后
後漢明帝即位尊母陰皇后為皇太后

章帝即位尊明帝馬皇后為皇太后及太后喪乃策書

加所生母賈貴人王赤綬

諸侯王赤綬也

安車一駟永巷宮人

二百

永巷宮中署名也後改為掖庭永巷宮人即宮婢也

御府雜帛二萬疋大司

農黃金千斤錢二千萬

和帝即位尊章帝竇皇后為皇太后

殤帝即位尊和帝鄧皇后為皇太后

安帝清河王慶子也母曰左姬建光元年追尊父慶為

孝德皇尊孝德皇元妃耿氏為甘陵大貴人

甘陵孝德皇之陵也

桓帝即位尊母匱氏為孝崇博園貴人

帝迎尊父蠡吾使冀曰孝崇皇

置園廟曰博園

和平元年梁太后葬就博陵尊貴人為孝崇皇后遣司

徒持節奉策授璽綬齋乘輿器服物備法物宮曰永樂

置太僕少府已下皆如長樂宮故事

漢宮儀帝祖母稱長信宮帝母稱長

樂宮故有長信少府長樂少府及職史皆宦者為之

又置虎賁羽林衛士起宮室

分鉅鹿九縣為后湯沐邑

靈帝母曰孝仁董皇后后河間人也為解瀆侯萇夫人
生帝帝即位追尊萇為孝仁皇陵曰慎陵以后為慎園
貴人及竇氏誅帝使中常侍迎貴人兄寵到京師上尊
號曰孝仁皇后居南宮嘉德殿宮稱永樂

熹平四年拜冲帝母虞大家為憲園貴人質帝母陳夫
人為渤海孝王妃先是梁冀秉政虞氏抑而不登但稱
大家而已陳夫人亦以梁氏故榮寵不及焉時小黄門

趙祐議郎卑整上言春秋之義母以子貴隆漢盛典尊
崇母氏凡在外戚莫不加寵今冲帝母虞大家質帝母
陳夫人皆誕生聖皇而未有稱號夫臣子雖賤尚有追
贈之典況二母見在不蒙崇顯之次無以述尊先世垂
示後嗣也帝感其言乃拜焉

魏文帝初即王位尊母卞氏為王太后及踐阼尊后曰
皇太后稱永壽宮

明帝即位尊卞太后曰太皇太后郭皇后曰皇太后稱

永安宮

齊王嗣位尊明元郭皇后曰皇太后稱永寧宮

陳留王燕王旦之子景元元年十一月燕王上表賀冬
至稱臣詔曰古之王者或有所不臣王將宜依此義表
不稱臣乎又當為報夫後大宗者降其私親况所繼者
重邪若便同之臣妾亦情所未安其皆依禮典處當務
盡其宜有司奏陛下稽德期運撫臨萬國紹太宗之重
隆三祖之基伏惟燕王體尊戚屬正位藩服躬秉虔肅

率蹈恭德以先萬國其于正典闡濟大順所不得制聖朝誠宜崇以非常之制奉以不臣之禮臣等平議以為燕王表章可聽如舊式中詔所施或存好問準之義類則宴覲之族也可少順聖敬嘉崇義稱示不敢斥宜曰皇帝敬問太王侍御至於制書國之正典朝廷所以辨章公制宜昭軌儀於天下者也宜循法故曰制詔燕王凡詔命制書奏事上書諸稱燕王者可皆上平其非宗廟助祭之事皆不得稱王名奏事上書文書及吏民皆

不得觸王諱以彰殊禮加於羣后上遵正典尊祖之制
俯順聖敬烝烝之心二者不愆禮實宜之普告施行

晉武帝以魏咸熙二年即位尊母太妃王氏曰皇太后
宮曰崇化初置宮卿重選其職以太常諸葛緒為衛尉
太僕劉源為太僕宗正曹楷為少府

泰始二年以景皇帝夫人羊氏居弘訓宮號弘訓太后
惠帝太熙元年四月即位尊武皇帝皇后楊氏曰皇太
后

明帝母荀氏元帝宮人及帝即位封建安君別立第宅
太寧元年帝迎還臺內供奉隆厚及成帝立尊重同於
太后

穆帝即位尊康帝皇后褚氏曰皇太后居崇德宮

哀帝即位詔有司議母貴人周氏位號太尉桓溫議宜
稱夫人尚書僕射江靄議應曰太夫人詔崇為皇太妃
儀服與太后同又詔朝臣不為太妃敬合禮典不太常
江道議位號不極不應盡敬

簡文帝即位尊褚太后曰崇德太后

孝武帝即位尊母李氏為淑妃太元三年進為貴人九年又進為夫人十二年加為皇太妃儀服一同太后十九年尊為皇太后稱崇訓宮

安帝隆安元年二月尊皇太后李氏為太皇太后

後魏獻文即位尊文成皇后馮氏為皇太后

孝文帝即位尊馮太后曰太皇太后

孝明帝即位尊宣武皇后高氏為皇太后又尊所生母

胡氏為皇太妃後又尊為太后

後周武帝即位尊母叱奴氏為皇太后又尊愍帝后元氏為孝愍皇后先是愍帝被廢后出俗為尼至是尊焉
宣帝即位尊武帝阿史那皇后為天元上皇太后又尊所生母李氏為天元聖皇太后

靜帝受禪尊天元上皇太后為太皇太后天元聖皇太后為太帝太后又尊宣帝天元大皇后楊氏為皇太后所生母天大皇后朱氏為帝太后其天中大皇后元氏

為天后太皇后天元皇后陳氏為天元太皇后

唐中宗神龍元年正月即位上天后尊號為則天大聖
六月以時屬炎暑恐則天皇后勞于臨御遂罷十日一
外朝更以朔望為常儀

玄宗開元四年正月戊寅朔帝御正殿受朝賀禮畢親
朝太上皇於西宮

肅宗時太上皇居興慶宮每日問安寢門聖皇亦時至
大明宮問皇帝及太上皇移於內地更選後宮為聖皇

所愛者百餘人赴西宮備灑掃又令萬安咸宜二長公主入侍養服御饌食窮以珍奇加于常日皇帝問安如舊

憲宗元和元年春正月丙寅朔帝率百寮於興慶宮奉

冊上太上皇尊號

事在尊號門

元和元年三月乙丑中書門下上表請尊太上皇后王氏為皇太后詔依

穆宗以元和十五年正月即位帝母憲宗貴妃郭氏是年閏正月乙卯詔曰朕光膺寶曆正位宸居大行皇帝

貴妃尊冠六宮母臨萬國謹上尊號曰皇太后

敬宗長慶四年正月癸酉即位二月己亥尊皇太后曰
太皇太后聖母王氏為皇太后

文宗寶曆二年十二月丁未即位戊申尊聖母蕭氏為
皇太后

太和元年五月壬戌朔帝赴興慶宮起居太皇太后宗
正卿李銳率諸宗屬詣右銀臺門進名起居丙寅帝赴
興慶宮上壽內外端午進獻如常歲

四年四月以有司貢新瓜獻赴興慶宮奉太皇太后及皇太后并分賜十宅諸王已下初有司以帝命送諸宮時歲餼味雖太后之尊一槩以賜為名帝始即位嘗因內園進櫻桃將以賜三宮太后帝曰馬可以為賜因授筆易其文簿曰奉太后自是以為常

十一月己亥日南至帝繇複道謁太皇太后實歷太后于興慶宮

五年正月庚子朔以陰雨連旬罷元會之禮帝複道朝

賀太皇太后于興慶宮

六年正月乙未朔以久雪廢元會帝赴興慶宮起居太皇太后義安太后

宣宗即位尊母郭氏為皇太后

僖宗即位尊聖母王氏為皇太后

哀帝二年五月有司修皇太后宮畢中書奏皇太后慈惠臨人寬仁馭物景叶倪天之兆克彰誕聖之符今輪奐新宮規模舊典崇訓既徵於信史積善宜顯於昌期

太后宮請以積善為名從之

後唐莊宗即位尊母曹氏曰皇太后又冊武皇夫人劉氏為太妃同光中詔曰皇太后母儀天下子視羣生當別建宮闈顯標名號異因稱謂益表尊嚴宜以長壽宮為名

三年正月甲午朔皇太后生辰帝御嘉慶殿召諸王家宴極歡而罷

閔帝即位尊明宗皇后曹氏曰皇太后又冊王氏為皇

太妃

晉少帝嗣位冊高祖皇后李氏為皇太后尊母王氏為

皇太妃

漢隱帝即位尊高祖皇后李氏為皇太后

尊師

周禮師氏以媿詔王傳曰詔於天子無北面又曰當其為師則弗臣然則尊賢貴德承師問道屈萬乘之重明五學之義上以達經國之要下以得化人之本是知尊

師重傅則法度存雖曰聖人必繇學也嚴恭之道於是
在焉若乃尊其爵位委以樞要厚師臣之遇執弟子之
禮或不名以示恩或乞言以敦教生則優其奉祿歿則
蒙其渥澤至於幸第以存問變服以臨弔皆所以成主
善之美繇誥德之旨誠帝者之懿範也故曰雖天子必
有尊也斯之謂歟

神農師悉謂

悉姓
謂名

黃帝師大撓

大撓作
甲子者

一云學乎太真

顓頊師伯夷父一云學乎綠圖

帝嚳師伯招一云學乎赤松子

帝堯師子州支父一云學乎尹壽

帝舜師許由一云學乎務成跗

夏禹師大成摯一云學乎西王國

商湯師小臣即伊尹一云學乎威子伯

高宗學先王之道於甘盤甘盤賢臣有道德者

周文王既為西伯師呂尚東海上人蓋嘗窮困年老矣

以漁釣于西伯

事具宰相
佐命門

西伯與語大說曰自吾先君

太公曰富有聖適周以興子真是邪吾太公望子久矣
故號之曰太公望立為師一云學乎錫疇子斯

武王即位九年東伐師尚父左杖黃鉞右把白旄以誓遂
至盟津諸侯不期而會者八百及踐阼詔師尚父而問曰
昔黃帝顓頊之道存乎意亦忽不可得見與師尚父曰
在丹書王欲聞之則齊矣王齊三日端冕師尚父亦端
冕奉書而入負屏而立王下壇南面而立師尚父曰先

王之道不北面王行西折而南東面而立師尚父西面
道書之言

成王以周公為太師公薨成王葬於畢

不敢臣周公故
使近文王之墓

漢昭帝時光祿大夫給事中蔡義以韓詩進授帝數歲
拜為少府遷御史大夫代楊敞為丞相封陽平侯義為
丞相年八十餘短小無鬚眉貌似老嫗行步俛即俯僂字也
常兩吏扶夾乃能行時大將軍霍光秉政議者或言光

置宰相不選賢苟用可顯制者

顯與
專同

光聞之謂侍中左

右及官屬曰以為人主師當為宰相何謂云云

云云衆
語謂有

不選賢
之言也

此語不可使天下聞也又韋賢為博士給事中

以詩進授帝稍遷光祿大夫詹事至大鴻臚宣帝即位
以先帝師甚見尊重

元帝為太子時孔霸為大中大夫以選授皇太子經遷

詹事高密相

是時諸侯王
相在郡守上

帝即位徵霸以師賜爵關內

侯食邑八百戶號褒成君

為帝師故令成
就故曰褒成君

給事中加賜

黃金二百斤第一區徙名數于長安及薨帝素服臨弔

者再至賜東園秘器錢帛策贈以列侯禮謚曰烈君

初元中制詔御史曰國之將興尊師而重傅故前將軍

望之

蕭姓

傅朕八年道以經術厥功茂焉其賜望之爵關

內侯食邑六百戶給事中朝朔望坐次將軍

周堪初為太子少傅及帝即位堪為光祿大夫與蕭望之並領尚書事

歐陽地餘初為元帝太子中庶子授經後為博士論石渠及帝即位侍中貴幸至少府

成帝為太子時張禹鄭寬中皆授經於帝及即位以師
錫爵關內侯寬中食邑八百戶禹六百戶拜為諸吏光
祿大夫秩中二千石給事中領尚書事

建始中鄭寬中卒谷永上疏曰臣聞聖王尊師傅褒賢
雋顯有功生則致其爵死則異其禮謚者周公薨以變

禮而當天心

周公死成王欲葬之於成周天方雷雨以
風盡偃大木斯拔國大恐王乃葬周公于

畢示不教臣也事見尚書
大傳而與古文書不同

公叔文子卒衛侯加以美謚

著為後法

公叔文子衛大夫公叔發也文子卒其子請
謚於君君曰昔日衛國凶饑夫子為粥與國

之餓者不亦惠乎衛國有難夫子以其死衛寡人不亦貞乎夫子聽衛國之政脩其班制以與四隣交衛國社稷不辱不亦文乎
謂夫子貞惠文子
近事大司空朱邑右扶風尹翁歸德

茂天年孝宣皇帝愍冊厚賜贊命之臣靡不激揚贊佐也

關內侯鄭寬中有顏子之美質包商偃之文學

論語云文學子

游子夏商子夏名偃子游名

嚴然總五經之妙論立師傅之顯位入

則鄉唐虞之閔道王法納乎聖德

閔大也言陳聖王之法聞于天子

出

則參冢宰之重職功烈施乎政事退食自公私門不開

退食

自公召南羔羊詩之辭言退退所食之祿務從至公之道也

散賜九族田畝不益德

配周召中合羔羊末德登司徒有家臣

司徒掌禮教之臣言寬中學行

堪為之也家臣若今諸公國官及輔佐也

卒然早死尤可悼痛臣愚以為宜

加其葬禮賜之令謚

令善也

以章尊師褒賢顯公之德鴻

嘉中張禹老病乞骸骨帝加優再三廼聽許賜安車馬

馬黃金百斤罷就第以列侯朝朔望位特進見禮如丞

相置從事史五人益封四百戶天子數加賞賜前後數

千萬禹雖家居以特進為天子師國家每有大政必與

定議大將軍王根害禹寵數毀惡之

惡謂言其過惡

天子愈益

敬厚禹每病輒以起居聞

謂其飲食寢臥之增損

車駕自臨問之

帝親拜禹牀下

平帝年幼選署師友大司徒孔光以明經高行為孔氏師京兆尹金欽以家世忠孝為金氏友

後漢明帝為太子時桓榮以少傅授太子經學及即位尊榮以師禮甚為親重拜二子為郎榮年踰八十自以衰老數上書乞身輒加賞賜乘輿嘗幸太常府令榮坐東面設几杖會百官驃騎將軍東平王蒼以下及榮門

生數百人天子親自執業每言輒曰太師在是既罷悉以大官供具賜大常家其恩禮若此

永平二年三雍初成拜榮為五更每大射養老禮畢帝輒引榮及弟子升堂執經自為下說乃封榮為關內侯食邑五千戶榮每疾病輒遣使者存問大官大醫相望於道及篤上疏謝恩讓還爵土帝幸其家問起居入街下車擁經而前撫榮垂涕賜以牀茵帷帳刀劍衣被良久乃去自是諸侯將軍大夫問疾者不敢復乘車到門

皆拜牀下榮卒帝親自變服臨喪送葬賜冢塋于首山之陽除兄子二人補四百石都講生八人補二百石其餘門徒多至公卿

五年以侍中右中郎將包咸為大鴻臚咸建武中以郎中入授皇太子論語又為其章句拜諫議大夫帝即位每進見賜以几杖入朝不趨贊事不名經傳有疑輒遣小黃門就舍即問帝以咸有師傅恩而素清苦常特賞賜珍玩束帛奉祿增於諸卿咸皆散與諸生之貧者病

篤帝親輦駕臨視

章帝為太子時張酺侍講及即位出為東郡太守元和二年東巡狩幸東郡引酺及門生并郡縣掾史並會庭中帝先備弟子之儀使酺講尚書一篇然後脩君臣之禮賞賜殊特莫不沾洽

魏高貴鄉公幸太學命太常王祥為三老祥南面几杖以師道自居天子北面乞言祥陳明王聖帝君臣政化之要以訓之聞者莫不砥礪

晉明帝即位以東宮時師傅猶宜盡敬乃下詔曰朕以
不德風遭閔凶猥以眇身託于王公之上哀矜在疚靡
所諂仰憂懷惴惴如臨于谷孔子有云故雖天子必有
尊也朕將祇奉先師之禮以諂有德大宰西陽王名秩
尊望重在貴思降丞相武昌公王司空即丘子王體道
高邈勲德兼備先帝執友朕之師傅太常安陽侯訓保
朕躬忠肅篤誠夫崇親尊賢先帝所重朕見四君及書
疏儀體一如東宮故事

後魏明帝在藩邸時梁越以上大夫授諸皇子經書及
即作以師傅之恩賜爵祝阿侯

太武為監國時盧醜以篤學博聞授經後以師傅舊恩
賜爵濟陰公

宣武為太子時孫惠蔚侍講東宮及即位之後仍在左
右敷訓經典延昌二年追賞侍講之勞封棗彊縣開國
男食邑三百戶

後周武帝少嘗受業於盧光及即位以光為陝州總管

府長史卒贈賻有加常典贈太子少保

唐玄宗為太子時褚無量以國子祭酒侍讀及即位加右散騎常侍與秘書監兼昭文館學士馬懷素同為侍讀每次閣門則令乘肩輿以進上居別館以路遠則命宮中乘馬或親自送迎以申師資之禮開元六年懷素卒帝為之舉哀廢朝一日贈潤州刺史物三百段米粟一百石喪事所需並官給八年褚無量卒帝震悼久之謂宰相宋璟蘇頲等曰無量碩儒且有德業朕早所師

習每用尊崇三史九經前言往行有可以裨益時政規
正朕躬未嘗不造膝切論所聞其屬纊之時難以脩書
為儀永念其逝實軫予懷庶事宜皆優厚

德宗居春宮張涉為侍讀及即位之夕召涉入宮庶政
小大皆咨之恩禮甚崇多所弘益

尊乳保

禮曰國君世子生三日卜士之妻大夫之妾使食之又
曰擇於諸母與可者必求其寬裕慈惠溫良恭敬慎而

寡言者次為保母皆居子室蓋所以資保阿之力育端
聖之體如渭城淮陽厥功茂焉厚賞其子錫之公田亦
無爽古三年勞賜之意也降及東漢其禮益厚元魏之
世至有僭母后之號濫陵寢之名者亦已甚乎故當以
義斷恩以禮制事而取厥中焉

漢武帝少時東武侯母嘗養帝帝後號之曰大乳母率
一月再朝朝奏入有詔使幸臣馬將卿以帛五十疋賜
乳母又奉飲糒飧養乳母乳母上書曰某所有公田願

得假倩之帝曰乳母欲得之乎以賜乳母乳母所言未嘗不聽有詔得令乳母乘車行馳道中當此之時公卿大臣皆敬重乳母乳母家子孫奴從者橫暴長安當道掣頓人車馬奪人衣服聞於中不忍寘之法有司請徙乳母家室處之於邊奏可即入見辭去時有所幸倡郭舍人疾言罵之曰咄老女子何不疾行陛下已壯矣寧尚須汝乳而活邪帝悲之乃下詔止無徙乳母

宣帝生數日以武帝曾孫坐衛太子事繫郡邸獄故廷

尉監丙吉知太子無事實重哀曾孫無辜擇謹厚女徒

令保養曾孫置間燥處

間寬淨也燥高敞也

吉治巫蠱事連歲不

決曾孫病幾不全者數焉吉數敕保養乳母加致醫藥

視遇甚有恩惠及帝即位吉絕口不道前恩地節三年

掖庭宮婢則

則婢名也史失其姓

令民夫上書自陳有阿保之功

謂未為宮婢時有舊夫在民間

辭引吉吉謂則曰汝嘗坐養皇曾孫不

謹督笞汝安得有功

督謂視祭之

獨渭城胡組淮陽郭徵卿

有恩耳分別奏組等供養勞苦狀詔吉求組徵卿已死

有子孫皆受厚賞詔免則為庶人賜錢十萬

後漢安帝封乳母王聖為野王君

聖因保養之勤緣思故恣女伯榮出入宮

掖侍通奸賂司徒震上疏曰臣聞政以得賢為本禮以去穢為務是以唐虞俊乂在官四山流放天下咸服以致雍熙方今九德未事嬖倖充庭阿母王聖出自賤微得遭千載奉養聖躬雖有推燥居濕之勤前後賞惠報遇勞苦而無厭之心不知紀極外交屬託擾亂天下損辱清朝塵點日月書戒牝鷄晨鳴詩刺哲婦喪國昔鄭莊公從母氏之欲恣驕弟之情幾至危國然後加討春秋貶之以為失教夫女子小人近之善遠之恣實為難養易曰無攸遂在中饋言婦人不得與於政事也宜速出阿母令居外舍斷絕伯榮莫使往來令恩德兩隆上下俱美惟陛下絕婉孌之私割不忍之心留神萬機戒慎拜爵減省獻御損節微發令野無鶴鳴之歎朝無小

明之梅大東不與於今勞止不怨於下擬踪往古比德
哲王豈不休哉奏入帝以示阿母等內侍皆懷忿志餘

具宰輔

諫諍門

順帝封乳母宋娥為山陽君邑五千戶初帝自太子廢
為濟陰王娥與黃門孫程等共議立帝帝後以娥前有
謀遂封之

靈帝封乳母趙嬈為平氏君

其後蔡邕上疏曰前者乳
母趙嬈貴重天下生則貴

藏侔於天府死則丘墓踰於園陵兩
子受封兄弟典郡疏具諫臣直諫門

晉元帝中興乳母阿蘇有乳保之功賜號保聖君

成帝以乳保母周氏有阿保之勞欲假其名號內外皆奉詔侍中顧和獨上疏以為周氏保佑聖躬不遺其勲第舍供給擬於戚屬恩澤所加已為過隆若假名號記籍未見明此惟漢靈帝以乳母趙嬈為平氏君此末代之私恩非先代之令典若君舉必書將軌物垂則書而不法後嗣何觀帝從之

後魏太武始光二年尊保母竇氏曰保太后延和元年尊為皇太后初竇氏以夫家坐事與二女俱入宮操行

純備進退以禮明元命為帝保母性仁慈勤撫導帝感其
恩訓奉養不異所生既尊為皇太后又封其弟漏頭為遠
東王竇氏訓釐內外甚有稱聲性恬素寡欲喜怒不形於
色好揚人之善隱人之過帝征涼州蠕蠕吳提入寇太后
命諸將擊走之太平真君元年崩詔天下大臨三日太保
盧魯元監護喪事謚曰惠葬崑山從后意也初后嘗登崑
山顧謂左右曰吾母養帝躬敬神而愛人若死而不滅必
不為賤鬼然於先朝本無位次不可違禮以從園陵此山

之上可以終託故葬焉別立后寢廟於崞山建碑頌德

文成帝初立尊保母常氏為保太后興安二年三月尊為皇太后和平元年崩詔天下大臨三日謚曰昭葬於廣甯磨笄山俗謂之鳴雞山太后遺志也依惠太后故事別立寢廟置守陵二百家樹碑頌德常氏本遼西人因事入宮乳帝有功勞保護之功累尊為皇太后其兄英字世華自肥如令超為散騎常侍鎮軍大將軍賜爵遼西公弟喜鎮東大將軍祠曹尚書帶方公三妹皆封縣君妹夫王暕為平州刺史遼東公

追贈英祖父苻堅扶風太守亥為鎮西將軍遼西蘭公父
渤海太守澄為侍中征東大將軍太宰遼西獻王英母許
氏為博陵郡君遣兼太常盧度世持節改葬獻王於遼西
樹碑立廟置守冢百家太安初英為侍中征東大將軍太
宰進爵為王喜左光祿大夫改封燕郡從兄泰為安東將
軍朝鮮侯訢子伯夫散騎常侍選部尚書次子員金部尚
書喜子振太子庶子三年英領太師評尚書事內都大官
伏寶泰等州刺史五年詔以太后母宋氏為遼西王太妃

和平元年喜為雒州刺史初英事宋不能謹而睹奉宋甚至就食於和龍無車牛宋疲不進睹負宋於笈至是宋於英等薄不如睹之篤謂太后曰何不王睹而黜英太后曰英為長兄門戶主也家內小小不順何足追計睹雖盡力故是他姓奈何居英上本州郡公亦足報耳天安中英為平州刺史訢為幽州刺史伯夫進爵范陽公英濁貨徙燉煌諸常自興公及至是皆以親疏受爵賜田宅時為隆盛後伯夫為雒州刺史以贓汙欺妄徵斬於京師承明元年

徵英復官後員與伯夫子禽可共為飛書誣謗有司執憲
刑及五族孝文帝以昭太后故罪止一門文明太后以昭
太后故悉出其家前後没入婦女以喜子振試守正平郡
唐中宗神龍元年封乳母于氏為平恩郡夫人

玄宗先天二年五月太上皇誥曰皇帝乳母蔣氏莫氏
等行籍柔良心惟靜順襁褓祇事夙効於勤勞井邑分
封宜申於寵命蔣氏可封吳國夫人莫氏可封燕國夫
人是歲九月詔曰燕國夫人竇氏慈慧和順掌執禮經

女憲母師獨高柔則朕在孩幼躬勞乳養遠惟恩義寧
忘夙昔瞻既往而莫追見如存而永慕撫渭城之事未
足為言視南陽之書益增其感俾錫朝寵微申朕懷俸
料祿課等一准職事三品給

代宗大歷八年六月勅曰古者緣情立禮著慈母之制
蓋聖人示德無不報之禮而漢宣帝亦追祿掖庭郡邸
嘗有阿保之勤以功深淺並授封賞記于前典歷代是
之故妳婆元氏朕在襁褓受其撫育推乾就濕慈愛特

深可謂仁人厚惠茂德者矣可贈潁川郡太夫人

憲宗元和五年十月贈保母盧氏為燕國夫人

哀帝天祐二年九月勅妳婆楊氏可封昭儀妳婆王氏

可封郡夫人弟二妳婆王氏先昭宗皇帝封郡夫人今

准楊氏例改封

中書門下奏曰伏以妳婆楊氏等保持夙宵善養勞苦且隆恩澤以報勤劬竊

以事體參詳合陳管見臣聞周制宮職夫人只列三人漢氏後宮之等十有四元帝時置昭儀位視丞相秩比諸侯王至於列妾惟稱夫人亦無裂土割郡之號以乳母郭微卿胡組著保養宣帝之功後子孫只受厚賞而無封爵之號且帝外祖母封博平君非乳母之例後漢順帝封阿母宋氏為山陽君則致漢陽地震安帝時封

乳母王聖為野王君亦致地震京師其時中正上言亦以封爵過當乃貽厥咎非叶高祖山河之約至晉室中興乳母阿蘇有乳保元帝之功賜號保聖君既非爵邑又彰其功爰擇美名在理甚當至高齊陸令宣以乾阿妳投封郡君尋亂制度中宗神龍元年封乳母于氏為平恩郡夫人景龍四年封尚食高氏為偕國夫人封爵之失始自于此後睿宗下詔封玄宗乳母莫氏為夫人竊以中宗朝政歸韋氏睿宗朝駕躡軒轅當時無復紀綱歷載寢為訛弊伏以陛下重興寶運再闢丕圖奉高祖太宗之舊行往代前賢故事克臻至道以顯中興庶彙提綱衆務畢舉今者追封保母為郡夫人再至加恩須至封國夫人竊以婦人無爵從夫之爵以賞功勳則命爵又四方多事方注意公卿以勲勞昭著者室家爵邑自郡夫人今則宣授乳母為郡夫人加恩必及列土朝廷大柄以爵祿為主命爵不定其等差則天下之人無以為貴以為貴功則封比礪山榮室則爵同乳母臣

等竊意有室家者實恥之況四海九州之內有功勞安社稷勲賢得不對室家慙於所命之爵其所封乳母楊氏王氏臣等參詳望賜釐革雖居濕推燥畢彰保養之勤但胙土分茅且異疏封之例況昭儀內侍燕寢位列宮嬪夫人則亞列妃嬙供奉左右竊按儀禮乳母總以其名母方有總服今則不可以嬪御之號增榮於阿保揆于禮文有乖事體宜加眷佑當樹鴻私永示規程以服寰宇臣等高量妳婆楊氏望賜號安聖君妳婆王氏望賜號福聖君第二妳婆王氏望賜號康聖君從之

周太祖廣順二年九月癸未制敦叙九族糾綏六親生者錫其寵臨沒者優其追贈哲王茂典歷代芳規故南陽郡韓氏婉淑居貞賢明垂範奉嬪率禮興家道於仁

孝之基諸母推恩撫朕躬於幼冲之歲朝露溘先而奚
速慶雲華陰以彌高宜洽明恩追崇大國式是載揚之
美寧攄欲報之情庶俾後昆永覃清懿噫嘻貞魄享此
儀章可追封楚國太夫人太祖孩幼而孤楚國撫視教
道有恩故有是命

冊府元龜卷三十八

欽定四庫全書

冊府元龜卷三十九

宋 王欽若等 撰

帝王部

睦親

傳曰君子篤於親則民興於仁蓋先王因親以教愛自
家邦而達天下也高辛而上書紀靡詳若夫唐堯親族
虞帝大孝夏禹拜敦叙之言商書垂立愛之訓周家忠
厚內睦九族二帝三代以來何莫繇斯也已厥後令王

率循茲道乃有賜高年之典隆閨門之禮慰撫思念發於至誠卹乏振滯形於軫惻逮於弛甸人之戾續宗正之籍錄其孤息歸其削壤親親之恩斯為至矣其帝者之盛德歟

唐堯克明峻德以親九族

能明俊德之士任用之
以睦高祖玄孫之親

九族

既睦平章百姓

既已也百姓百官言
化九族而平和章明

周成王燕兄弟召公作常棣之詩而歌以親之其詩曰

常棣之華鄂不韡韡

冰華者曰鄂不鄂足得華之光
明則韡韡然盛喻弟以敬事兄兄以

榮覆弟思義之顯亦鞞鞞然也又燕宗室同姓諸侯作湛露之詩曰湛

湛露斯在彼豐草厭厭夜飲在宗載考

湛湛露盛貌豐草喻同姓諸侯

也夜飲之禮在宗室同姓諸侯則成之

漢文帝四年五月復諸劉有屬籍家無所與賜諸侯王

子邑各二千戶

武帝初即位方好藝文以淮南王安屬為諸父

安于武帝服屬

為從父叔父

辨博善為文辭甚尊重之每宴見談說得失及

方技賦頌昏暮然後罷元朔二年賜几杖不朝

城陽王子福為海常侯坐法失爵武帝平閩粵封福為
繚婁侯從軍無功以宗室故侯

衡山王賜淮南王安之弟也安謀反賜當坐收有司請
逮捕衡山王帝曰諸侯各以其國為本不當相坐

建元三年諸侯王來朝帝初即位大臣多寃鼂錯之策
皆以諸侯連城數十秦強欲稍侵削數奏暴其過惡諸
侯王自以骨肉至親先帝所以廣封連城犬牙相錯者
為磐石宗也今或無罪為臣下所侵辱有司吹毛求疵

答服其臣使證其君多自以侵寃至是天子置酒中山
王勝聞樂聲而泣因言羣臣黨議朋友相為使夫宗室
擯卻骨肉永釋於是帝乃厚諸侯之禮省有司所奏諸
侯事加親親之恩焉

元光元年四月復七國宗室前絕屬者

昭帝後元二年二月即位七月賜長公主及宗室昆弟
各有差

始元二年以宗室母在位者舉茂才劉辟疆劉長樂皆

為光祿大夫辟疆守長樂衛尉

長樂宮之衛尉也

宣帝地節元年六月詔曰蓋嘗聞堯親九族以和萬國朕蒙遺德奉承聖業惟念宗室屬未盡而以罪絕若有賢材改行勸善其復屬使得自新

甘露三年烏孫楚主解憂上言年老思土願得歸骸骨葬漢地天子閔而迎之公主與烏孫男女三人俱來至京師公主年且七十賜以公第田宅奴婢奉養甚厚朝見儀比公主後二歲卒三孫因留守墳墓

解憂楚王戊之孫也

成帝即位以淮陽王欽屬為叔父敬寵之異於它國王
上書自陳舅張博時事頗為石顯等所侵因為博家屬
徙者求還丞相御史復劾欽前與博相遺私書指意非
諸侯所宜蒙恩勿治事在赦前不悔過而復稱引自以
為直失藩臣禮不敬上加恩許王還徙者

建始二年秋罷太子博望苑

武帝為衛太子作此苑令受賓客也

以賜宗

室朝請者

平帝元始元年詔宗室為吏舉廉佐史補四百石

言宗室為

吏者皆令舉廉各徒本秩而依廉
吏遷之為佐史者則補四百石

後漢光武建武二年十二月詔曰惟宗室列侯為王莽所
廢先靈無所依歸朕甚愍之其並復故國若侯身已歿屬
所上其子孫見名尚書封拜

屬所謂侯子孫所屬之郡縣也
錄其見名上于尚書封拜之

十三年二月詔宗室及絕國封侯者一百七十三人

明帝時廣陵王荆有罪自殺帝封荆子元壽為廣陵侯
服王璽綬食荆故國六縣又封元壽弟三人為鄉侯明
年帝東巡狩徵元壽兄弟會東平宮班賜御服器物又

取皇子與馬悉以與之

濟南王康在國不循法度交通賓客其後人上書告康
招來州郡奸狡漁陽顏忠劉子彥等又多遺其繒帛案
圖書謀議不軌事下考有司舉奏之帝以親親故不忍
窮竟其事但削祝阿隰陰東朝陽安德西平昌五縣

建初

八年章帝復
還所削地

永平四年四月楚王英有罪自殺帝制詔英母許太后
曰國家始聞楚事幸其不然既知審實懷用悼灼庶欲

宥全王身令卒天年而王不念顧太后竟不自免此天命也無可奈何太后其保養幼弱勉飲食諸許願王富貴人情也已詔有司出其有謀者令安田宅許太后薨復遣光祿大夫持節弔祠留護喪事賻錢五百萬又遣謁者備王官屬迎英喪改葬彭城加王赤綬羽蓋華藻如嗣王儀追爵諡曰楚厲侯帝幸彭城見英夫人及六子厚加贈賜

章帝建初三年帝饗衛士於南宮因從皇太后周行掖

庭池閣乃閱陰太后舊時器服愴然動容乃留五時衣

各一襲

五時衣謂春青夏赤季夏黃秋白冬黑也衣單複具曰襲

及常所御衣合五

十篋餘悉分布諸王及子孫在京師者各有差特賜東平憲王蒼及瑯琊王京書曰中大夫奉使親聞動靜嘉之何已歲月驚過山陵浸遠孤心悽愴如何如何間饗衛士於南宮因閱視舊時衣服聞於師曰其物存其人亡不言哀而哀自至信矣惟王孝友之德亦豈不然今

送光烈皇后假紵帛巾各一

周禮追師掌王后之首服為副副編鄭玄云副婦人首服

三輔謂之假紉續
漢書帛字作阜

及衣一篋可時奉贍以慰凱風寒泉

之思

詩國風曰凱風美孝子也凱風自南吹彼棘心棘
心夭夭母氏劬勞爰有寒泉在浚之下有子七人

母氏勞苦寒泉在
今濮州濮陽縣

又欲令後生子孫得見先后衣服之製

今魯國孔氏尚有仲尼車輿冠履明德盛者光靈遠也

孔子廟在魯曲阜城中伍緝之從征記曰魯人藏孔子
所乘車於廟中是顏路所請者也獻帝時廟遇火燒之

冠履解見
鍾離意傳

其光武皇帝器服中元二年已賦諸國故不

復送并遺宛馬一匹血從前髀上小孔中出嘗聞武帝

歌天馬霑赤汗今親見其然也

前書天馬歌曰太一況
天馬下沾赤汗沫流赭

頃反虜尚屯將帥在外憂念遑遑未有間寧願王寶精
神加供養苦言至戒望之如渴六年蒼上疏求朝明年
正月帝許之特賜裝錢千五百萬其餘諸王各千萬帝
以蒼冒涉寒露遣謁者賜貂裘及大官食物珍果使大
鴻臚竇固持節郊迎帝乃親自循行邸第豫設帷牀其錢
帛器物無不充備下詔曰禮伯父歸寧乃邦詩云叔父
建爾元子敬之至也昔蕭相國加以不名優忠賢也況
兼親尊者乎其沛濟南東平中山四王贊皆勿名蒼既至

升殿乃拜天子親答之七年大鴻臚奏遣諸王歸國帝特留東平王蒼賜以秘書列僊圖道術秘方至八月飲酎畢有司復奏遣蒼乃許之手詔曰骨肉天性誠不以遠近為親疎然數見顏色情重昔時念王久勞思得還休欲署大鴻臚奏不忍下筆顧授小黄門中心戀戀惻焉不能言於是車駕祖送流涕而訣復賜乘輿服御珍寶輿馬錢布以億萬計

和帝永元十五年幸章陵祠舊宅會宗室於舊廬勞賜

作樂

元興元年宗室以罪絕者悉復屬籍

安帝元初六年任城國相行弘奏王安輕易貪吝請廢之帝不忍以一歲租五分之一贖罪

順帝陽嘉元年詔宗室絕屬籍者一切復籍質帝即位還王侯所削戶邑

靈帝熹平二年愍王寵嗣陳王國相師遷追奏前相魏愔與寵共祭天神希幸非冀罪至不道有司奏遣使者

案驗是時新誅渤海王悝帝不忍復加法詔檻車傳送
惜遷詣北寺詔獄使中常侍王醜與尚書令侍御史雜
考惜辭與王供祭黃老君求長生福而已無他冀幸醜
等奏惜職在規正而所為不端遷誣告其王罔以不道
皆誅死有詔赦寵不案

中平三年黃巾賊起甘陵王忠為國人所執既而釋之
帝以親親故詔復國

魏太祖時族子真字子丹少孤帝哀之收養與諸子同

使與文帝共止

明帝太和五年八月詔曰古者諸侯朝聘所以敦睦親親協和萬國也先帝著令不欲使諸王在京都者謂幼主在位母后攝政防微以漸關諸盛衰也伏惟不見諸王十有二載悠悠之懷能不興思其令諸王及宗室公侯各將適子一人朝復有少主母后在宮者自如先帝令申明著于令

景初中詔曰陳思王植雖有過失既克已慎行以補前

闕且自少至終篇籍不離于手誠難能也其收黃初中諸奏植罪狀公卿已下議尚書中書秘書三府大鴻臚者皆削除之撰錄植前後所著賦詩銘雜論凡百餘篇副藏內外

晉明帝即位西陽郡王叢放縱兵士劫鈔所司奏免叢官詔不問

恭帝時有庚戌制不得藏戶彭城王玄匿五戶桓温表玄犯禁收付廷尉既而宥之

後魏道武即位秦明王翰子儀以事賜死儀子纂五歲
帝命養於宮中恩與諸皇子同時襲衛王儀坐事死道
武欲敦宗親之義詔引諸王子弟令入宴常山王素等
三十餘人咸謂與衛王相坐疑懼皆出逃遁將奔蠕蠕
唯陳留王崇獨至帝見之甚悅厚加禮賜遂寵敬之素
等於是亦安

明元永興四年十一月內賜宗室近屬南陽王良已下
至於總麻之親布帛各有差

大武嘗顧樂安王範之長子良曰兄弟之子猶子也親撫養之長而壯勇多知常參軍國大計

獻文時崇舊齒拜華山王鷲曾孫襄陽侯乞斤外都大官甚優重

孝文太和十一年五月詔復七廟子孫及外戚總麻服已上賦役無所與

十七年五月壬戌宴四廟子孫於宣文堂帝親與之齒行家人之禮又嘗宴王公侍臣於清徽堂命黃門郎崔

光郭祚通直郎邢巒崔林等賦詩言志燭至公卿辭退
李沖再拜上千萬歲壽帝曰卿向以燭至故辭復獻千
萬之壽朕報卿以南山之詩帝曰燭至辭退庶姓之禮
在宗載考宗族之義卿等且還朕與諸王宗室欲成此

夜飲

又云孝文詔延四廟之子下逮玄孫之胄申宗宴
于皇信堂不以爵秩為列悉序昭穆為次用家人

禮之

汝陰王天賜景穆之子坐貪殘削除官爵卒帝素服哭
於思政觀贈本爵葬從王禮

南安王楨出為相州刺史帝餞楨於華林都亭詔曰從
祖南安既之藩任將曠違千里豫懷憫戀然今者之集
雖曰分岐實為曲宴並可賦詩申意射者可以觀德不
能賦詩者可聽射也當使武士彎弓文人下筆孝文送
楨於階下流涕而別楨坐事削除母劉太妃薨孝文親
幸臨慰及葬贈布帛綵五百段

齊郡王簡文成第四子帝嘗與簡俱朝元明太后於皇
信堂簡居帝之右行人禮遷太保孝文仁孝以諸父

零落存者唯簡每見立以待之俟坐致敬問起居停簡
拜伏文帝將議革變舊風大臣有難色又每引劉芳郭
祚等密與規模共論時政國戚謂遂疎已快快有不平
之色乃令陸凱私喻之曰至尊但欲廣知前事直當問
其古式耳終無親彼而相疏也國戚舊人意乃稍解至
於遷雜改官制服禁絕舊言東陽公丕皆所不願帝亦
不通之但誘示大理令其不生同異至於衣冕已行朱
服列位而不猶常服列在坐隅晚乃稍加弁帶而不能

脩飾容儀帝以不年衰體重亦不強責及罷降非道武
子孫及異姓王者雖較於公爵而利享封邑亦不減
獻文子雍為高陽王帝時幸雍第皆盡家人之禮

北海王詳獻文之子領司徒侍郎錄尚書事嘗別住華
林之西隅與都亭官路密邇相接亦通後門帝每潛幸
其所肆飲終日其寵如此又詳拜受因其私慶請帝帝
頻幸南第御其後堂與高太妃相見呼為阿母伏而上
酒禮若家人臨出高每拜送舉觴祝言願官家千萬年

壽歲歲一至妾母子舍也

孝明熙平二年八月戊戌宴道武已來宗室年十五以上於顯陽殿用家人之禮

又詔曰皇魏開基道邁周漢禪建二都德盛百祀雖帝胤蕃衍親賢並茂而猶沉屈素履巾褐衡門非所謂廣命戚族翼屏王室者也今可依世近遠叙之列位

正光中詔曰周德崇厚蔡仲享國漢道仁恕淮南畢王皆所以申恩赦戚蠲溢舊譽義彰曩策詠流前史頌者

咸陽京兆王自貽禍敗事繇間惑猶有可矜兩門諸子
並可聽附屬籍中山王熙弟略以熙舉兵略遂奔梁梁
用為宣城太守俄而徐州刺史元法僧據城南叛州內
士庶皆為法僧擁逼梁武乃以畧為大都督令詣彭城
接誘初附略至屯於河南為安樂王鑒所破略惟數十騎
入城梁尋遣其豫章王綜鎮徐州徵畧與法僧同還略
雖在江南自以家禍晨夜哭泣與法僧言未嘗一笑梁
復除畧衡州刺史未行會綜以城歸國綜長史汪革司

馬祖暉將士五千人悉見擒擄孝明勅有司悉遣革等還南因以徵略梁乃備禮遣之略之將還也梁為置酒餞別賜金銀百斤梁之百官悉送別江上遣其右衛徐確率百餘人送至京師孝明詔光祿大夫刁雙境首勞問又勅徐州賜布帛各千疋除略侍中義陽王食邑一千戶還達石人驛亭詔宗室親黨內外百官先相識者聽迎之近郊賜帛三千疋宅一區其司馬始賓除給事中領直候栗法光本縣令刁昌東平太守刁雙西兗州刺史

其略所至一餐一宿之處無不霑賞尋改封東平王

孝昌二年閏十一月詔曰頃舊京淪覆中原喪亂宗室
子女籍在七廟之內為雜戶濫門所拘辱者悉聽離絕
陸昕之尚獻文女常山公主無男以昕之從兄道第四
子彰為後彰妻即咸陽王禧女禧誅養彭城王第莊帝
親之略同諸姊

西魏文帝大統七年十二月御憑雲觀引見諸王叙家
人之禮手詔為宗誠十條以賜之

後周太祖姊建安長公主子賀蘭祥年十一而孤居喪合禮長於舅氏特為帝所愛

邵惠公顥第二子導之子廣曾侍食高祖所食瓜美持以奉進高祖悅之

隋高祖時河間王弘字辟惡帝從祖弟也父元孫死齊為周所并弘始入關與帝相得帝哀之為買田宅

唐高祖於宗親彌見敦睦遂迎拜揖如家人之禮焉

武德七年四月丙午宴王公親屬於文明殿高祖見長

平王太妃以尊屬從家人禮降階再拜酒小闌徙坐翠
華殿帝賦詩王公遞上壽賜帛各有差

太宗貞觀十五年五月丁未幸濟北公李城第敦親親
也

十七年二月辛巳朔帝謂侍臣曰前代皇王莫不疎弟
愛子唯漢明帝曾賜諸王不令子多於弟良史書之垂
美後葉我罔極之恩情鍾諸弟於是內外諸王同有班
賜

五月辛酉改葬元昌及祐以國公之禮元昌母妻子並

宥給其田宅

元昌高祖第七子也初封漢王坐太子承乾事死馬祐太宗第五子初封齊王亦以

反死

十八年三月甲午幸同安大長公主第帝以主春秋高

嘗有風疾故親加省視賜絹五百疋侍主疾者賜絹有

差

膠東公道彥淮安王神通之子丁父憂廬於墓側容貌

柴毀帝聞而嘉歎令侍中王珪就家開喻

河間王孝恭貞觀中為襄州行臺左僕射人或告其謀反者徵還京師為憲司所告赦拜左金紫光祿大夫

高宗以貞觀二十二年五月即位諸王及舊在藩者並加真封滿一千戶賜物三千段中馬十匹

彭王元則薨高宗為之舉哀贈司徒荊州都督柩車至京帝復罷朝命百官及諸親就第展哀及發引帝登望春宮望之而哭

中宗神龍元年二月詔皇室子孫諸王妃主駙馬等自

垂拱已來非命者皆不望殯宜令州縣尋求處所以牲
牢致祭仍追復官爵備禮改葬其王并令陪葬昭獻二
陵有嗣者即令承襲無嗣者聽取近親為後

三月制曰君臣朝序貴賤之禮斯殊兄弟天倫先後之
儀亦異聖哲之制率繇斯道朕臨茲寶樞信在崇高負
宸當陽雖受宗枝之敬退朝私謁仍用家人之禮近代
以來罕尊軌度王及公主曲致私情姑叔之尊拜於子
姪違法背禮情用惻然自今已後宜從革弊安國相王

及太平公主更不得輒拜衛王重俊兄弟及常寧公主
弟姨妹等先告宗屬知朕意焉

先是諸王及公主皆以親為貴天子之子諸臣

叔見者必先拜告致啟事帝志欲敦叔親族故下制以革斯俗

睿宗唐隆元年七月制曰皇后公主既尊且親有遷幽之義無戮辱之典倉卒之時亂兵所及致不以禮深用憮然宜矜罪戾且慰泉壤韋氏可一品禮葬悖逆庶人可三品禮葬所司准式譙王重福以謀逆死睿宗詔曰集州刺史譙王重福幼則克頑長而險詖幸託體於先

聖嘗通交於巨逆不臣不子自絕於天有國有家莫容於代往者頗不含忍令幽繫自大行晏駕韋氏臨朝將肆屠滅尤加防衛洎天有成命集于朕躬永懷猶子之情庶叶先親之義所以開置寮屬往隆刺舉冀其悔改以怙恩榮而註誤有徒狂狡未息便即私出均州詐乘驛騎至於都下遂逞其謀先犯屯兵次燒左掖計窮力屈投河而斃雖人所共棄邦有常刑我非不慈爾自招咎且聞其故有惻於懷昔劉長既歿楚英遂殞以禮收

葬抑惟舊章屈法申恩宜仍舊寵可以三品禮葬

玄宗先天二年二月詔曰朕奉天明命虔受睿圖而皇室子弟未能稱職堂姪餘慶承煦紹宗行淹祚洽爾從弟璲志謙等不能謹身奉法而乃輕侮國章擯斥邊隅未為塞責朕憫其愚昧屈法申恩並追赴京令於國子監安置讀書如悔過自新克復先訓所司條奏當議其官皇宗親更有左貶嶺南邊遠州非惡逆緣坐等色中亦宜准此其有見任別駕年齒尚幼未堪理百姓者宜

委中書門下及新興郡王晉李斯訓等簡擇追赴京其
祿俸一事已上並本州委勾當每季付送入京分付其
餘慶等本州祿亦准此宗親中有才行灼然為衆推揖
者按察使具以名聞朕當擢以不次自今後有犯贓私
違禮經者准法科處刑茲無赦庶敦睦之情必聞於九
族自家刑國允洽於羣心宜各勉勵以識朕意

開元六年十一月丙申玄宗親謁太廟下詔七廟元皇
帝已上三祖枝孫恐有失官序者宜各五品京官皇妃

諸家有子孫今在選叙者量加甄擇

十一年太原祀后土畢大赦天下皇親中有文武才用堪任使者委宗正具名以薦當有獎擢

十二年勅曰停繼國王禮合停廢以朕近屬特宜並封郡王乃降封再從兄將作大匠嗣江王禕為信安郡王秘書少監嗣蜀王禛為廣漢郡王再從叔太子員外率更令嗣密王徽為濮陽郡王再從兄太子員外家令嗣趙王瑤為中山郡王十五年七月戊戌幸寧王憲之第憲誕辰也

二十五年五月辛丑命有司選宗子有才者宗正薦四
從叔前奉天令知正四從叔前祁縣令志遠五從弟雒
陽尉遇六從弟酸棗丞良五從弟武進尉肅五從姪鄭
縣尉瞻五從姪前宋州參軍承嗣皆授臺省官及法官
京縣官詔曰至公之用本無偏黨唯善所在豈隔親疎
四從叔知正等咸有才名見推公族秉惟清之操兼致
遠之資朕每慮宗盟不勤于德嘗懸右職以勸其徒先
委宗卿精為內舉量能考行歷在踰時名數則多升聞

蓋寡光膺是選諒在得人固可擢以清要遷于臺閣將
觀志于七子冀籍名於八人宜各悉行佇聞成績書不
云乎九族既睦平章百姓冀繇內而理外必自近而及
遠凡今懿戚可不慎歟違道慢常義無私於王法脩身
効節恩豈薄於他人期於率先勵我風俗深宜自勉以
副明言

七月帝追念故惠宣太子深憫其子瓊乃下制曰兄弟之
子於近屬而特深恩禮之情在諸孤而更切故惠宣太

子男樂安郡王瑗能自砥礪克脩名檢續承先績休有
令聞宜受賜於千室俾傳芳於萬葉可食實封一千戶
天寶三載八月祠九宮禮畢制皇親五等已上及九廟
子孫諸親三等已上未出身與出身其前茲者選日稍
優與處分見任更賜勲兩轉

肅宗至德二年十二月詔持盈尊師及儀王已下各賜
物五百疋長公主各與一子官嗣王及郡縣主各與一
子六品官皇親五等已下及九廟子孫及親等人見任

者並與改轉

三年正月大赦詔皇五等已下親及九廟子孫有材學
政理委宗正寺揀擇聞薦

代宗廣德元年十月吐蕃盜入長安邠王守禮之孫廣
武王承宏竊尊號及京城平鑾輿自陝州還京師十二
月丙申放廣武王承宏于華州一切不問

德宗以大厯十四年即位詔叔祖潁王已下叔彭王已
下弟蜀王已下大長公主長公主公主各與一子京官

邵縣主嗣王郡王各與一子出身

建中元年十一月自己卯至庚辰出嫁岳陽信寧宜芳
順朗陵安陽襄陵德清南華元城新鄉等縣主初開元
中置禮會院於崇仁里自兵興以來廢而不脩公郡縣
主多不以時降嫁殆三十年至有華髮者雖處內館而
不獲覲見帝初即位特謁太廟始與郡縣主相見尊者
展其敬幼者申其愛歔歔涕泣感動左右至是皆以時
降嫁禮物資送無大小必經聖心戚族老幼無不悲感

貞元元年十一月癸卯日南至上祀昊天上帝于園丘禮畢詔大長公主各與一子七品官嗣王郡主縣主各與一子出身應陪位皇親三品已上賜爵一級四品五品一階六品已下及當選散官等簡選日優與處分五年十二月詔郡縣主聳有正員官停者郡主每季給錢七十千縣主每季給五十千郡縣主聳已亡歿者亦准支給先是其主聳與官罷者頗不自給帝務於敦睦有是命

六年六月以部國大長公主薨其子端州流人蕭位等五人並召還

八年正月壬午詔在京宗室每年三節宜准百官例宴會若大選集賜錢三百千非大選集錢三減一宗室任常參官者同之

順宗初即位赦制曰大長公主嗣王等各與一子官及出身有差

憲宗元和二年春正月南郊赦宗子中有才用者委中

書門下量才叙用

敬宗長慶四年正月即位三月壬子大赦其六宅十宅諸王女宜令每年於選人中擇端良者降嫁

寶曆二年二月乙卯襄陽公主自西內有勅歸於里第以其男等有請從之

公主先以罪囚于禁中故也

文宗以寶曆二年十月乙巳即位丁巳以絳王薨帝不視朝三日詔曰叔父絳王為逆賊等援立竊窺大位既無討賊之意遂使忠義銜冤及王師擒妖義旅問罪前

驅勇氣以致殲殂伏以太皇后慈仁思以慰解宜令有
司量事收葬申恩討賊刑禮之中示于四方以明朕意
太和元年赦詔太后第二等已上親大行皇帝皇太后
第一等親妻中書門下量才叙用九廟子孫陪位者各
加兩階仍據始封每王後與一人出身妻宗正卿簡尋
圖譜取一房最深翳者充數具名聞奏

四年六月勅越王貞實陷非辜載在國史子孫久廢獎
錄所宜宜付宗正寺尋勘譜諜如是後嗣具狀聞奏至

是宗正奏閱實貞諸孫勅付宗正寺收入屬籍仍賜陪位出身

七月賜十六宅諸王綾絹二萬疋以內庫充

開成元年八月詔朕因暇日嘗幸戚藩引見諸王爰加錫宴而故信王孫林行列之間皤然白首問其年齒則七十而有七詢其昭穆則玄宗之雲孫朕仰思開元之時威明之禮大體承訓迨於朕躬惕然動懷當食興歎况尊祖之義立愛自親尚齒之文繇家刑國觀其威儀甚整視聽

不衰載懷愍矜所宜敬異永惟烈祖之德用錫孝孫之

慶旌其祚裔特舉徽章遽申開府之秩寵以分茅之貴

俾從異等式是殊恩可嗣信王仍賜開府儀同三司

初

宗自藩邸與寧王憲等友睦既即位升右都督刺史京師立第宅通賓客及在位之久待諸王益至天寶末惟永王一人出入大門自是累朝子孫雖白首不入宮禁帝深思敦叙之義因是有命

十二月帝於禁中會讌諸王因命講讀劉仲武每雙日入內對諸王仍令尚食供食

二年夏五月壬申帝幸十六宅召教坊樂人五人與諸

王宴樂

九月丙戌封故絳王長女為江華縣主故深王第三女
為長壽縣主帝敦睦情深自近年公主縣主出降者相

繼

十月戊戌詔曰書載堯典首陳睦族詩歌周德寶美維
城朕嗣統百王憲章二代義雖本於叙族道無愧於尊
賢式遵舊章爰舉成命嘉王運循王通恭王通等孝敬
恭恪敏裕齊莊播蘭蒞之清芬炳珪玉之符采易凌沛

獻詩掩楚元古人素風造次於是師氏典訓周旋以之
固可以超金紫之貴階升台鉉之崇秩策勳詔爵以寵
分茅並可金紫光祿大夫檢校司空賜上柱國仍依百
官例給料錢物檢校吏部尚書安王溶檢校兵部尚書
潁王灑宜並從百官例賜料錢

三年正月金華縣主臨邑縣主因參賀入內上言家貧
帝愍之各賜錢一百貫綵絹一百疋

四月甲午幸十六宅賜諸王宴頒賜有差

四年春丁卯夜於咸泰殿觀燈作樂三宮太后及諸公主並赴宴

六月甲寅故越王貞玄孫女道士玄貞進狀曾祖名珍是越王第六男先天年得罪流配嶺南祖父皆亡歿嶺外雖累蒙洗雪未還京師去開成三年十二月內嶺南節度使盧均出俸錢接借哀妾二代旅櫬暴露各在一方特與發遣歸就大塋合祔今護四喪已到長安旅店權下未委故越王墳所在伏乞天恩允妾所奏許歸大

瑩妾年已六十三孤露家貧更無所依詔曰越王事迹國
史著明枉陷非辜尋以洗雪其子珍他事配流數代漂
零不還京國玄貞弱女孝節卓然啓護四喪綿歷萬里
況是近族必可加恩行路猶或嗟稱朝廷固須卹助委
宗正寺京兆府與訪越王墳墓報知如不是陪陵任祔
塋下葬其葬事仍令京兆府接借必使備禮葬畢玄貞
如願住京城便配宜觀安置

庚申帝幸十六宅安王頹王院宴樂賜錢各五千貫絹

一千疋銀器二十事帝與安王潁王兄弟也故大宴特異

後唐莊宗同光二年二月南郊赦曰宗子維城本枝百代禮既行於配祖情敢忘於睦親應本朝皇親近屬因緣僞梁之遁遐遠並仰所在搜訪如非謬妄即與奏聞到京委宗正寺大勘不虛並與量材敘錄

三年三月丁酉帝宴皇親於復宮之山亭皇子弟如家人之禮內弟子作樂

明宗同光四年四月即位時河中軍校王舜賢奏節度使李存審今月三日棄城出奔不知所在教曰寡人允副羣情方監國事外安黎庶內睦家親庶諧敦叙之規永保隆平之運一昨京師變起禍難薦臻於戚屬之門不測驚奔之所慮因藏竄濫被傷夷言念于茲自然流涕宜令下河南府及諸道應諸王眷屬等昨因變起出奔所至即時津送如不幸物故者即量事收瘞以聞長興元年七月壬午勅先朝諸王頃因同光末年宮門

變起諸王多奔北京沿路為部下所害宜於北京留守
尋訪之所各依品秩禮葬訖奏聞

閔帝應順元年正月陝州康思立言河中節度使洋王
從璋在任日用內省絹未填帝以昆仲不之報

晉高祖從父弟贇少而無賴棄其家私竄久流落於民
間及帝鎮太原訪求始獲之署為牙校

冊府元龜卷三十九

欽定四庫全書

冊府元龜卷四十

宋王欽若等撰

帝王部

文學 好文

文學

書稱堯之德曰文思舜之德曰文明禹之德曰文命而咸以稽古著於典謨之首是知王者嚮明而治經緯天地臨炤百官未有不尚於文德者也故河圖雒書聖作

而明述股肱元首君唱而臣和商周而下簡策具存或
受學甘盤或觀書乙夜采薇之詠發於文王黃竹之歌
成於穆滿過沛宮而擊筑橫汾水而興辭是皆帝王之
文也易曰觀乎人文以化成天下禮曰君子如欲化民
成俗其必繇學乎若乃聽斷之餘清閒之宴留神文雅
煥乎成章汎濫典籍取鑑古義以茲為務者固有益於
政治誠聖哲之用心其或攻乎異端溺於小巧肆情閨
闈流蕩淫靡者亦足以為戒也

伏羲氏仰觀象於天俯觀法於地觀鳥獸之文與地之
宜近取諸身遠取諸物於是始畫八卦以通神明之德
以類萬物之情

虞舜作歌曰勅天之命惟時惟幾乃歌曰股肱喜哉元
首起哉百工熙哉

殷湯作盤銘曰苟日新日日新又日新

周文王重易六爻作上下篇

漢高帝十二年過沛留置酒沛宮悉召故人父老子弟

佐酒發沛中兒得百二十人教之歌上擊筑自歌曰大
風起兮雲飛揚威加海內兮歸故鄉安得猛士兮守四
方令兒皆和習之

藝文志載帝
歌詩二篇

武帝元狩元年十月行幸雍祠五時獲白麟作白麟之
歌

元鼎四年六月得寶鼎后土祠旁秋馬生渥洼水中作
寶鼎天馬之歌元鼎五年得鼎汾陰作歌元封二年芝
生甘泉齋房作芝房之歌二年至瓠子臨決河命從臣

將軍呂下皆負新塞河堤作瓠子之歌五年冬南巡狩

至於盛唐自尋陽浮江親射蛟江中獲之舳艫千里薄

擬

音千
松反

陽而出作盛唐擬陽之歌太初四年貳師將軍

廣利斬大宛王首獲汗血馬來作西極天馬來歌太始

三年二月行幸東海獲赤鴈作朱鴈之歌四年四月幸

不其祠神人于交門宮若有鄉坐拜者作交門之歌又

自造賦一篇

後漢明帝制五家要說章句令桓郁校定於宣明殿華

嶠書曰帝自制五行章句此言五家即謂五行之家也
魏武帝剏造大業文武並施御軍三十餘年手不捨書
晝則講武策夜則思經傳登高必賦及造新詩被之管
絃皆成樂章作氣出唱詞精列詞度関山詞殫露詞蒿
里詞對酒詞陌上桑詞短歌行秋胡行苦寒行塘上行
善哉行步出東西門行又特好兵法抄集諸家兵法名曰
接要又注孫武十三篇皆傳於世
文帝年八歲能屬文有逸才遂博貫古今經傳諸子百
家之書初為魏公太子時聞鍾繇有玉玦欲得之而難

密使臨菑侯轉因人說之繇即送之與繇書曰夫玉以
比德君子見美詩人晉之垂棘魯之璆璠宋之結綠楚
之和璞價越萬金貴重都城有稱疇昔流聲將來是以
垂棘出晉虞虢雙擒和璧入秦相如抗節竊見玉書稱
美玉白若截肪黑譬純漆赤擬鷄冠黃侷蒸栗側聞斯
語未覩其狀雖德非君子義無詩人高山景行私所仰
慕然四寶邈焉以遠秦漢未聞有良匹是以求之曠年
未遇厥真私願不果饑渴未副近見南陽宗惠叔稱君

侯昔有美玦聞之驚喜笑與抃俱當自白書恐傳言未
審是以令舍弟子建因荀仲茂轉言鄙旨乃不忽遺厚
見周稱鄴騎既到寶玦初至捧跪發匣爛然滿目猥以
蒙鄙之姿得觀希世之寶不煩一介之使不損連城之
價既有秦昭章臺之觀而無蘭生詭奪之誑嘉貺益腆
敢不欽承後繇為相國以五熟釜鼎範因太子鑄之釜
成太子與繇書曰昔有黃之三鼎周之九鼎咸以一體
使調一味豈若斯釜五味時芳蓋鼎之烹飪以享上帝

以養聖賢昭德祈福莫斯之美故非大人莫之能造故
非斯器莫宜盛德今之嘉釜有逾茲美夫周之尸臣宋
之考父衛之孔悝晉之魏顆彼四臣者並以功德勒名
鍾鼎今執事寅亮大魏以隆聖化堂堂之德於斯為盛
誠太常之所宜銘彝器之所宜勒故作斯銘勒之釜口
庶可贊揚洪美垂之不朽銘曰於赫有魏作漢藩輔厥
相惟鍾實幹心膺靖恭夙夜匪遑安處百寮師師楷茲
度矩又常與元城令吳質書曰季重無恙途路雖局官

守有限願言之懷良不可任足下所治僻左書問致簡
益用增勞每念昔日南皮之遊誠不可忘既妙思六經
逍遙百氏彈棊間設終以博奕高談娛心哀箏順耳馳
騫北場旅食南館浮甘瓜於清泉沉朱李於寒水皦日
既歿繼以朗月同乘並載以遊後園輿輪徐動賓從無
聲清風夜起悲笳微吟樂往哀來淒然傷懷余顧而言
茲樂難常足下之徒咸以為然今果分別各在一方元
瑜長逝化為異物每以念至何時可言方今蕤賓紀辰

景風扇物天氣和暖衆果具繁時駕而游北遵河曲從
者鳴笳以啓路文學託乘於後車節同時異物是人非
我勞如何今遣騎到鄴故使枉道相過行矣自愛二十
三年太子又與質書曰歲月易得別來行復四年三年
不見東山猶歎其遠况乃過之思何可支雖書疏往反
未足解其勞結昔年疾疫親故多罹其災徐陳應劉一
時俱逝痛何可言邪昔日游處行則連輿止則接席何
嘗須臾相失每至觴酌流行絲竹並奏酒酣耳熱仰而

賦詩當此之時忽然不自知樂也謂百年已分長共相保何圖數年之間零落略盡言之傷心頃撰其遺文都為一集觀其姓名已為鬼錄追思昔游嘗在心目而此諸子化為糞壤可復道哉觀古今文人類不護細行鮮以名節自立而偉長獨懷文抱質恬淡寡欲有箕山之志可謂彬彬君子矣著中論二十餘篇成一家之業辭義典雅足傳於後此子為不朽矣德璉常斐然有述作意才學足以著書美志不遂良可痛惜間歷觀諸子之

文對之收淚既痛逝者行自念也孔璋章表殊健微為繁富公幹有逸氣但未道耳至其五言詩妙絕當時元瑜書記翩翩致足樂也仲宣獨自善於辭賦惜其體弱不足起其文至於所善古人無以遠過也昔伯牙絕絃于鍾期仲尼覆醢於子路愍知音之難遇傷門人之莫逮也諸子但為未及古人亦自一時之雋也今之存者已不逮矣後生可畏來者難誣恐吾與足下不及見也行年已長大所懷萬端時有所慮至乃通夕不瞑何時

復類昔日已成老翁但未白頭耳光武言年已三十在
軍十年所更非一吾德雖不及年與之齊以犬羊之質
服虎豹之文無衆星之明假日月之光動見瞻仰何時
易邪恐永不復得為昔日游也少壯真當努力年一過
往何可攀援古人思秉燭夜游良有以也頃何以自娛
頗復有所造述不東望於邑裁書叙心建安末疫癘大
起時人雕傷太子感歎與所素敬者大理王朗書曰生
有七尺之形死為一棺之土唯立德揚名可以不朽其

次莫如著篇籍疫癘數起士人雕傷余獨何人能全其
壽故論撰所著典論詩賦蓋百餘篇又使諸儒撰集經
傳隨類相從凡千餘篇號曰皇覽黃初六年常行幸廣
陵故城臨江觀兵於馬上為詩帝天資文藻下筆成章
博聞廣識才藝無該帝自叙曰余唯喜彈碁略盡其妙
少為之賦上雅好詩書文籍雖在軍旅手不釋卷每每
定省從容嘗言人少好學則思專長則善忘長大而能
勤學者唯吾與袁伯業耳余是以少誦詩論及長備歷

五經四部史漢諸子百家之言靡不畢覽嘗嘉漢文帝之為君寬仁玄默務欲以德化民有賢聖之風時文學諸儒或以為孝文雖賢其於聰明通達國體不如賈誼帝繇是著太宗論曰昔有苗不賓重華舞以干戚尉佗稱帝孝文撫以恩德吳王不朝錫之几杖以撫其意而天下賴安乃弘三章之教愷悌之化欲使曩時累息之民得濶步高談無危懼之心若賈誼之才敏籌畫國政特賢臣之器管晏之資豈若孝文大人之量哉三年之

中以孫權不復班太宗論於天下示不願征伐也他日
又從容言曰顧我亦有所不取於漢文帝者三殺薄昭
幸鄧通慎夫人衣不曳地集上書囊為帳帷以為漢文
儉而無法舅后之家但當養育以恩而不當假借以權
既觸罪法又不得不害矣其欲秉持中道以為帝王儀
表者如是明帝大和四年詔太傅三公以帝典論刻石
立於廟門之外

魏初人疑無火浣布文帝以為火性酷烈無含生之氣著之典論明其不然之

事絕智者之聽及明帝立詔三公曰先帝昔著典論不朽之格言其刊石於廟門之外及太學與石經並以永

示來世景初三年西域使至而獻火浣布焉於是刊滅此論天下笑之

帝又作陌上桑詞

燕歌行善哉行折楊柳行煌煌京雒行明帝作苦寒行
善哉行步出夏門行擢歌行

高貴鄉公嘗與中護軍司馬望侍中王沈散騎常侍裴
秀黃門侍郎鍾會等講宴於東堂并屬文論名秀為儒
林文人沈為文籍先生望會亦各有名號帝性急召欲
速秀在內職到得及時以望在外特給追鋒車虎賁卒
五人每有集會望輒奔馳而至

甘露元年二月宴羣臣於太極東堂與侍中荀顛尚書
崔贊袁亮鍾毓給事中中書令虞松等並講述禮典遂
言帝王優劣之差帝慕夏少康因問顛等曰有夏既衰
后相殆滅少康收集夏衆復禹之績高祖拔起隴畝驅
帥豪雋芟夷秦項包舉寓內斯二主可謂殊才異畧命
世大賢者也考其功德誰宜為先顛等對曰夫天下重
器王者天授聖德應期然後能受命創業至於階緣前
緒興復舊績造之與因難易不同少康功德雖美猶為

中興之君與世祖同流可也至如高祖臣等以為優帝
曰自古帝王功德言行互有高下未必創業者皆優紹
繼者咸劣也湯武高祖雖俱受命聖賢之分所覺懸殊
少康殷宗中興之美夏啓周成守文之盛論德較實方
諸漢祖吾見其優未見其劣顧所遇之時殊所名之功
異耳少康生於滅亡之後降為諸侯之隸崎嶇逃難僅
以身免能布其德而兆其謀卒滅過戈過戈二
國名克復禹
績祀夏配天不失舊物非至德宏仁豈濟斯勲漢祖因

土摧之勢仗一時之權專任智力以成功業行事動靜
多違聖檢為人子則數危其親為人君則囚繫賢相為
人父則不能衛子身歿之後社稷幾傾若與少康易時
而處或未能復大禹之績也推此言之宜高夏康而下
漢祖矣諸卿且論詳之翌日講業既畢顛亮等議曰三
代建國列土而治當其衰弊無土崩之勢可懷以德難
屈以力逮至戰國強弱相兼去道德而任智力故秦之
弊可以力爭少康布德仁者之英也高祖以力智者之

雋也仁智不同二帝殊矣詩書述殷中宗高宗皆列大雅少康功美過於二宗其為大雅明矣少康為優宜如詔旨贊毓松等議曰少康雖積德累仁然上承大禹遺澤餘慶內有虞仍之援外有靡艾之助寒浞讒慝不德于民澆殪無親外內棄之以此有國益有所因至於漢祖起自布衣率烏合之衆以成帝者之業論德則少康優課功則高祖多語資則少康易較時則高祖難帝曰諸卿論少康因資高祖創造誠有之矣然未知三代之

世任德濟勲如彼之難秦項之際任力成功如此之易
且太上立德其次立功漢祖功高未若少康盛德之茂
也且夫仁者必有勇誅暴必用武少康武烈之威豈必
降於漢祖哉但夏書淪亡舊文殘缺故勲美闕而罔載
唯有伍員粗述大略其言復禹之績不失舊物祖述聖
業舊章不愆自非大雅兼才孰能與於此向令墳典具
存行事詳備亦豈有異同之論哉於是羣臣咸悅服中
書令松進曰少康之事去世久遠其文昧如是以自古

及今議論之士莫有言者德美隱而不宣陛下既垂心
遠鑑考詳古昔又發德音贊明少康之美始顯於千載
之上宜錄以成篇永垂於後帝曰吾學不博所聞淺狹
懼於所論未獲其宜縱有可採億則屢中又不足貴無
乃致笑後賢彰吾闇昧乎於是侍郎鍾會退而論次四
月丙辰帝幸太學問諸儒曰聖人幽贊神明仰觀俯察
始作八卦後聖重之為六十四立爻以極數凡斯大義
固有不完而夏有連山殷有歸藏周曰周易易之書其

故何也易博士淳于俊對曰庖犧因燧皇之圖而制八卦神農演之為六十四黃帝堯舜通其變三代隨時質文各繇其事故易者變易也名曰連山似山出內氣連天地也歸藏者萬物莫不歸藏於其中也帝又曰若使庖犧因燧皇而作易孔子何以不云燧人氏沒庖犧氏作乎俊不能答帝又問曰孔子作彖象鄭玄作注雖聖賢不同其所釋經義一也今彖象不與經文相連而注連之何也俊對曰鄭玄合彖象於經者欲使學者尋省

易了也帝曰若鄭玄合之於學誠便則孔子何為不合以了學者乎俊對曰孔子恐其與文王相亂是以不合此聖人以不合為謙帝曰若聖人以不合為謙則鄭玄何獨不謙耶俊對曰古義弘深聖問奧遠非臣所能詳盡帝又問曰繫辭云黃帝堯舜垂衣裳而天下治此庖犧神農之世為無衣裳但聖人化天下何殊異爾耶俊對曰三皇之時人寡而禽獸衆故取其羽皮而天下用足及至黃帝人衆而禽獸寡是以作為衣裳以濟時變

也帝又問曰乾為天而復為金為玉為老馬與細物並
耶俊對曰聖人取象或遠或近近取諸物遠則天地講
易畢復命講尚書帝問曰鄭玄云稽古同天言堯同於
天也王肅云堯順考古道而行之二義不同何者為是
博士庾峻對曰先儒所執各有乖異臣不足以定之然
洪範稱三人占從二人之言賈馬及肅皆以為順考古
道以洪範言之肅義為長帝曰仲尼言唯天為大唯堯
則之堯之大美在乎則天順考古道非其至也今發篇

開義以明聖德而舍其大更稱其細豈作者之意邪峻對曰臣奉遵師說未喻大義至於折中裁之聖思次及四嶽舉鯀帝又問曰夫大人者與天地合其德與日月合其明思無不周明無不炤今王肅云堯意不能明鯀是以試用如此聖人之明有所未盡耶峻對曰雖聖人之弘猶有所未盡故禹曰知人則哲惟帝難之然卒能改授聖賢緝熙庶績亦所以成聖也帝曰有始有卒其惟聖人若不能始何以為聖其言惟帝難之然卒能改

授益謂知人聖人所難非不盡之言也經云知人則哲
能官人若堯疑鯀試之九年官人失叙何得謂之聖哲
峻對曰臣竊觀經傳聖人行事不能無失是以堯失之
四凶周公失之二叔仲尼失之宰予帝曰堯之任鯀九
載無成汨陳五行民用昏墊至於仲尼失之宰予言行
之間輕重不同也至於周公管蔡之事亦尚書所載皆
博士所當通也峻對曰此皆先賢所疑非臣寡見所能
究論次及有鰥在下曰虞舜帝問曰當堯之時洪水為

害四凶在朝宜速登賢聖濟斯民之時也舜年在既立
聖德光明而久不進用何也峻對曰堯咨嗟求賢欲遜
己位嶽曰否德忝帝位堯復使嶽揚舉側陋然後薦舜
薦舜之本實繇於堯此蓋聖人欲盡衆心也帝曰堯既
聞舜而不登用又時忠臣亦不進達乃使嶽揚舉側陋而
後薦舉非急於用聖恤民之謂也峻對曰非臣愚見所
能逮及於是復命講禮記帝問曰太上立德其次務施
報為治何繇而教化各異皆脩何政而能致於立德施

而不報乎博士馬昭對曰太上立德謂三皇五帝之世以德化民其次報施謂三王之世以禮為治也帝曰二者致化薄厚不同將主有優劣邪時使之然乎昭對曰誠繇時有樸文故化有薄厚也

四年正月黃龍二見寧陵縣界井中是時龍仍見咸以為吉祥帝曰龍者君德也上不在天下不在田而數屈於井非嘉瑞也仍作潛龍之詩以自諷司馬文王見而惡之

晉懷帝即位於東堂聽政至於宴會輒與羣臣論衆務考經籍黃門侍郎傅宣歎曰今日復見武帝之世矣

穆帝永和十二年二月辛丑帝講孝經

孝武寧康三年九月親講孝經

後魏明元帝禮愛儒生好覽史傳以劉向所撰新序說苑於經典正義多有所闕乃撰新集三十篇採諸經古史該洽古義兼資文武焉

孝文帝雅好讀書手不釋卷五經之義覽之便講學不

師授採其奧旨史傳百家無不該涉善談莊老尤精釋
義富有才藻好為文章詩賦銘頌在輿而作有大文筆
馬上口授及其成也不改一字自太和十年已後詔冊
皆帝之文也自餘文章百有餘篇帝遷雒路繇朝歌見
比干墓愴然悼懷為文以弔之通直常侍劉芳為注解
表上之詔曰覽卿注殊為富博但文非屈宋理慙張賈
既有雅致便可付之集書帝嘗宴王公侍臣於清徽堂
命黃門郎崔光郭祚通直郎邢巒崔林等賦詩言志燭

至公卿辭退李冲再拜上千萬歲壽帝曰卿向以燭至故辭復獻千萬之壽朕報卿以南山之詩又親講喪服於

清徽堂從容謂羣臣曰彥和季豫等

彭城王總字彥和
北海王詳字季豫

年在蒙稚早登纓紱失過庭之訓并未習禮每欲令我一解喪服自審義解浮疎抑而不許頃因酒坐脫爾言從故屈朝彥遂親傳說將臨講坐慙戰交情御史中尉李彪對曰自古及今未有天子講禮陛下聖叡淵明事超百代臣得親承音旨千載一時

後周明帝幼而好學博覽羣書善屬文辭彩溫麗所著
文章十卷

武帝天和二年八月帝御大德殿集百寮及沙門道士
等親講禮記

建德二年十二月集羣官及沙門道士等帝升高座辨
釋三教先後以儒教為先道教為次佛教為後

隋文帝開皇五年勅內史令李德林撰錄作相時文翰
勒成五卷謂之霸朝雜集

煬帝初為晉王善屬文及為皇太子數有詩書遺牛弘弘亦有答及嗣位之後嘗賜宏詩其同被賜詩者至於文詞贊揚無如弘美

唐太宗貞觀初著金鏡述以示侍臣六年閏八月己巳至慶善宮宴三品已上於渭之濱帝甚歡賦五言詩

十一年十月辛丑幸集翠池宴五品已上帝曰公等酒既酣各宜賦一事帝賦尚書特進魏徵賦西漢其卒章曰終藉叔孫禮方知皇帝尊帝曰魏徵每言必約我以

禮此語極好特宜記錄

十二年三月著作郎鄧隆上表請編錄御製詩集不許
帝初以功定海內櫛風沐雨不暇於詩書者久矣暨于
嗣業進引忠良銳情思政朝夕孜孜求之若不及數年
之後道致隆平天下晏如四夷賓服遂於聽覽之暇留
情文史叙事言懷時有摛屬天才俊麗興寄玄遠博該
冊府文過擊玉故隆請編次焉其志不果

四月虞世南卒帝悼之未幾帝為詩一篇追思往古興

亡之道既而嘆曰鍾子期死伯牙破琴朕之此篇將何所示因令起居郎褚遂良詣其靈帳讀而焚之

十四年三月丁丑帝幸國子學親觀釋奠祭酒孔穎達講孝經帝問穎達曰夫子門人曾閔俱稱大孝而今獨為曾說不為閔說何耶答曰曾孝能全獨為曾能達也制旨駁之曰朕聞家語云曾皙使曾參鋤瓜而誤斷其本皙怒援大杖以擊其背應手仆地絕而復蘇孔子聞之告門人曰參來勿內既而曾子請焉孔子曰舜之事

父母也使之常在側欲殺之乃不得小箠則受大杖則走今參於父妾身以待暴怒陷父於不義不孝莫大焉繇斯而言孰愈於閔子騫也穎達不能對帝又謂侍臣曰諸儒各生異意皆非聖人論孝之本旨也孝者善事父母自家刑國忠於其君戰陳勇朋友信揚名顯親此之謂孝具在經典而論者多離其文迴出事外以此為教勞而非法何謂孝之道邪

十七年太子太師魏徵卒帝為製碑文并御書石刻畢

停於將作北門公卿士庶競以模寫車馬填噓日有數
千時人號其碑為二絕文與書也

十九年將征遼二月次河陽詔殷少師比干贈太師自
為文祭之次鄴經魏太祖墓自為祭文三月幸定州經
北岳自為祭文四月行軍總管姜確督兵攻蓋至城中
流矢而卒帝甚哀悼為五言詩以悼之

十月班師次漢武臺餘基三城傍有祠堂瑩域帝顧問
侍臣對曰此是燕齊之士為漢武求仙之處其地俯臨

大海長瀾接天岸多峻石竒怪之狀帝製文刻於石
十二月定州御步輦而行帝攬筆於輦中賦詩

二十年正月幸晉祠樹碑製文親書之於石

九月鐵勒諸部俟斤頡利發等遣使相繼而至靈州者
數千人咸請云願得天至尊為奴等作可汗子孫常為
天至尊作奴死無所恨於是北荒悉平帝為五言詩以
序其事公卿咸以此詩義兼懲勸可以垂誠將來請勒
石於靈州從之

二十一年八月骨利幹國遣使朝貢延陀之敗也詔遣雲麾將軍康野密往慰撫焉其俟斤大悅遣使隨野密入朝獻馬百匹有十四匹尤駿帝竒之各為製名號為十驥其一曰騰霜白其二曰皎雪驄其三曰凝露驄其四曰懸光驄其五曰決波駒其六曰飛霞驃其七曰發電赤其八曰流金馭其九曰翔麟紫其十曰奔虹赤帝乃為文以序其事厚待其使

二十二年正月帝撰帝範十二篇賜皇太子顧謂王公

曰飭躬闡政之道備在其中一旦不諱更無所言矣是日幸溫湯御製溫湯碑以示羣臣曰疇昔詞人已有此作朕又為之可得而比邪王公咸曰天文雄奧超象繫之表前代瑣瑣小詞豈得輒相比况乃神筆自書勒于溫井之側侍坐王公咸聽於碑陰容紀姓名官位三月帝以胡塵無警朔漠來王乃制戎狄賓服之文又制玉華宮山銘紀示羣臣詔令學士並作又蕭瑀拜特進參預政事帝謂房玄齡曰蕭瑀不可以厚利誘之不可以

刑戮懼之真社稷臣也乃降神筆賜詩曰疾風知勁草
板蕩識誠臣帝又追思王業艱難佐命之力又作威鳳
賦以賜司空長孫無忌帝少屬亂離久居兵陣及正位
已後遂博覽羣書總其宏綱殆於萬卷道文麗藻一時
冠絕學王羲之書窮盡體致物論以為帝數年之內經
史屬綴宮商自口起居郎傾耳揮翰百而不紀一焉

高宗為太子時貞觀二十二年二月引庶子少詹事司
議舍人等入閣乃從容而言曰文章詞賦平生所愛然

未之為也今日風景殊佳當與公等賦詩言志於是援
筆以制序翌日太宗以皇太子詩序示王公曰朕觀太
子此文及筆迹進於常日司徒長孫無忌對曰皇太子
稟承天訓文章筆札羣藝日新是歲太子制玉華宮山
銘又獻玉華宮賦

永徽五年五月制萬年宮銘刻石於永光門外仍令中
書門下及文武三品已上并學士自書名位碑陰而刻
之

顯慶二年六月帝製元首前星維城股肱等誠以示侍
臣禮部尚書弘文館學士許敬宗等表請班示天下帝
謙不許敬宗又上表請總名為天訓并請注解許之及
注畢敬宗為之序

十月幸鄭州次汜水帝以先帝於汜水擒竇建德因平
王世充於是刻石立頌以紀功自為頌文

五年三月幸并州童子寺賦詩而還

十二月較獵於長社之安樂川召侍臣及藩臣夜讌帝

賦詩以紀講習之事

龍朔元年冬十月狩於南山製東狩詩以示羣臣

麟德二年封禪十一月丁酉至平陰頓是日降雪帝賦詩皇后和

咸亨四年十一月帝自製樂章有上元二儀三才四時五行六律七政八風九宮十洲得一慶雲之曲以示羣臣令太常行之

儀鳳二年七月宴百寮及諸親於九成宮之咸亨殿酒

酈帝賦詩作栢梁體皇太子霍王元軌相王輪羣臣相
次繼作

中宗神龍三年八月乙未親送朔方軍總管韓國公張
仁亶於通化門外帝製序賦詩

十月庚子幸兵部尚書韋嗣立莊封嗣立為逍遙公帝
親製序賦詩

睿宗好學工草隸尤愛文字訓詁之書

玄宗開元八年親製春雪詩春臺望一章二十八句起

居舍人蔡孚奏曰伏見所製氣雄詞美德音相屬鄙炎
漢之奢侈徇有唐之儉陋知作勞而居逸念中人之家
產用心如此天下斯安臣職在司言請宣示百寮及編
國史手詔答曰朕以聽政之餘因時遊矚觀古人之制
度懷先王之卑菲聊遇所覽直書其事雖文詞非麗亦
不忘於言卿職在史官君舉必記將以朕之素意頒示
庶寮循諷表章益深祇勉

十年親注孝經頒示天下

十一年行幸北都親製起義堂頌刻石紀功於太原府之南街

十二年十一月幸東都至華州命刺史徐知仁與信安王禕勒石于華嶽祠南之通衢帝親製其文及親書信安王禕上言曰臣伏見御製西嶽碑文來從上玄光炤下土羣臣捧戴遊聖難名臣聞天作高山氣雄茲嶽壓洪河而傑起凌蒼昊而孤標近當國門用固京邑自巨靈開拓往帝巡遊精意嘗聞頌聲則未非勝賞難就蓋

詞翰無能不過非常之君孰覩非常之事陛下知其若
此金聲而玉振之乃發揮睿詞幽贊神化廣大極天地
光明融日月至理洞精微至功含造化合而成體散而
成章魏乎煥乎不可得而稱也又復親迂彩筆寫在香
牋隨手生姿入神變態勢如飛動妙絕古今諒得之自
然豈因之外物對揚天休臣子之常也美而無述過莫
大焉請以御製碑文頒示四海使伊昔之后自愧不才
率土之臣咸知所謂則雖死之日猶生之年從之

十三年封東嶽禮畢帝製紀泰山銘親札勒於山頂之石壁

十四年十月幸汝州至溫湯之行宮時屬雨雪帝親賦雨雪詩以示羣臣

十一月幸寧王憲宅與諸王宴探韻賦詩即日還宮

十五年五月端午宴羣臣于武成殿各賜衣一副自賦詩

六月朔方節度使兵部尚書蕭嵩赴朔方軍命有司於

定鼎門外供帳置酒以送之帝賦詩以光寵之

十二月幸溫泉宮登驪山石甕寺賦詩俾羣臣和焉

二十一年十二月二十一日祀后土於雒上帝自為文
禮畢令所司刊石於祀所

二十五年八月甲子帝制訓誡六篇以示諸王其旨蓋
明君臣父子之義齊祭稼穡之事也忠王嶼等上表請
宣付史官及示百寮許之宰臣李林甫等奏曰臣等伏
以聖謨垂訓輝映千古頒示朝廷未及天下兼望宣布

中外手詔諭曰周公聖人攝行王政誠伯禽曰無以魯國驕人朕方聖雖慙豈忘誠子聊示廷訓何足以宣布中外耶

天寶二年五月以重注孝經頒天下詔曰化人成俗率繇於德本移忠教敬實在於孝經朕思暢微言以理天下先為注釋尋亦頒行猶恐至蹟難明羣疑未盡近更探討因而筆削兼為敘述以究源流將發明於大順庶開悟於來學宜付所司頒示中外

四載帝讀洪範至無偏無頗而聲不和韻因改頗為陂
下詔曰典謨既作雖曰不刊文字或訛豈必相襲朕臨
政之暇乙夜觀書匪徒閱於微言實欲暢於精理每讀
洪範至無偏無頗遵王之義三復斯文並皆協韻唯頗
一字實則不偏又周易泰卦中無平不陂釋文云陂字
亦有頗音陂之與頗訓詁無別為陂則文亦會意為頗
則聲不成文應有煨燼之餘編簡墜缺傳授之際差乖
相沿原始要終雖有刊革朕雖先覺兼訪諸儒僉以為

然終非獨斷其尚書洪範無偏無頗字宜改為陂庶使
先儒之義去彼膏肓後學之徒正其魚魯仍宣于國學
五載詔曰道為理本孝實天經將闡教以化人必深究
於微旨朕欽承聖訓覃思玄宗頃改道德經載字為哉
仍隸屬上句及乎議定衆以為然遂錯綜真詮因成注
解又孝經舊疏雖粗發明幽晦探蹟無遺猶未能備今
敷暢以廣闢文且妙本逾玄微言久絕或怡然獨得或
參以諸家庶弘聖哲之規用叶君親之義仍令集賢院

具寫送付所司頒示中外

八載九月皇太子生日帝製仁孝詩六章札於步障以
賜太子令中官高力士以示朝臣宰相李林甫陳希烈
等奏曰伏見陛下因太子生日撰仁孝詩障子并書臣
等伏以宸章煥發睿札凝暉懸日月而齊光自雲霄而
下濟驚心靡據動色相歡太子稟自生知備承聖訓冲
姿有裕令望夙彰陛下示以義方形於翰墨爰於誕育
之日勗以仁孝之經上揚祖宗之美傍考天人之際錫

類所弘教義斯遠足可發揮前古垂範將來凡在衣冠
之流咸知父子之道豈比周稱嗣續造齒胄於上庠漢
寵元良但招賢於望苑王化之本實此知歸人倫所資
固不繇教臣等瑣陋謬典樞衡特奉鴻私幸覩殊貺捧
天書而竊抃仰聖澤以無寧無任悅豫之至望寫六章
頒示中外兼編諸簡策傳之不朽手詔報曰詩者志之
所之也將以道達情性宣揚教義耳朕承五聖之業受
萬民之寄主鬯叶於神心元良貞於國本美其踐履仁

孝恭脩友睦深慰於懷不覺形之諷詠今請具寫六章
頒示中外兼編諸簡策以傳不朽亦欲自家刑國以訓
人倫宜依來請

十載十月御朝元閣有慶雲見帝賦詩羣臣畢和

十四載三月御勤政樓宴羣臣帝賦詩數栢梁體羣臣
畢和

肅宗屬詞典麗經史百家莫不該覽目所一見嘗如誦
習

上元二年七月甲辰延英殿御座生玉芝一莖三花御製玉靈芝詩三章八句是歲李光弼出統河南諸軍帝於內殿宴送御製詩以寵之羣臣畢和

德宗貞元元年河東節度馬燧還太原製宸宸台衡二銘并序

四年三月甲寅宴百僚於麟德殿設九部樂及內出舞馬帝製序及詩以賜羣臣於是給御筆仍命屬和

九月癸丑百僚宴於曲江詔曰今日重陽卿等遊賞朕

遙想歡洽欣慰良多情發於衷因製詩序今賜卿等一本仍令中書門下簡定文士三五十人應制同用清字明日內於延英門進其文武百寮及文士欲和者聽翌日百僚畢和帝考其詩以劉太真李紆四人為上等鮑防于頎四人為次等張濛劉滋等二十二人為平等李晟馬燧李泌三人宰相不加考第

六年三月庚子百寮宴於曲江亭帝賦詩以賜之

七年七月帝幸章敬寺賦詩序皇太子在侍進和無題

于壁百僚畢和以班列焉其後京兆尹薛珣請皇太子書帝詩序刻石而填之以金

九年正月庚辰朔帝御含元殿受朝賀禮畢帝賦退朝觀軍仗歸營詩以示宰臣等

十年九月十日以重陽日宴賜百僚追賞初九日以雨罷宴及是方會宴帝賦詩以賜百官

十一年九月癸卯賜中書門下及兩省供奉官宴于曲江帝作詩賜百僚百僚畢和辛亥退朝召百僚詣延英

令中使宣喻曰昨九日聊示所懷文非工也卿等屬和
雅麗深所嘉之

十二年以政聽之餘深思理本迺著刑政箴

十三年九月重陽節賜宰臣及兩省供奉官宴于曲江
賜中書門下及百僚詩

十四年二月帝製中春麟德殿會百僚觀新樂詩仍令
皇太子書以示百僚

十七年二月朔賜羣臣宴于曲江帝命中使薛盈珍賜

詩九月重陽節賜羣臣宴于曲江命中使劉希昂宣慰
帝賜詩

十八年九月重陽節御製豐年多慶九月示懷詩以賜
羣臣

憲宗元和四年九月帝以天下無事留意典墳每覽前
代興亡得失之事皆三復其言又讀貞觀開元實錄見
太宗撰金鏡書及帝範上下篇玄宗撰開元訓誠思繼
前躅遂採尚書春秋後傳史記班范漢書三國志晉書

晏子春秋新序說苑等書君臣行事可為龜鏡者集成
十四篇一曰君臣道合二曰辨邪正三曰戒權幸四曰
戒微行五曰任賢臣六曰納忠諫七曰慎征伐八曰慎
刑法九曰去奢泰十曰崇節儉十一曰獎忠直十二曰
脩德政十三曰諫畋獵十四曰錄勲賢分為上下卷帝
自製其目曰前代君臣事跡至是以其書寫於屏風列
之御座之右復遣中使程文幹以書屏六扇至中書宣
示宰臣李藩裴均曰朕近撰此屏風嘗所觀覽故令整

將示卿藩等上表稱賀

文宗即位每對宰臣等未嘗不深言經學李石因奏施士丐春秋堪讀上曰朕嘗覽之穿鑿之學徒為異同耳學者如鑿井然得美水則已何必辛苦傍求然後為有得也

太和二年五月帝纂集尚書中君臣事跡命工圖寫於太液亭朝夕觀覽

九年五月乙巳朔以御集春秋左氏列國經傳三十卷

宣付史館

開成元年三月庚申帝幸龍首池觀內人賽雨賦暮春
喜雨詩云風雲喜際會雷雨遂流滋薦幣虛陳禮動天
實精思漸浸九夏節復在三春時霖霖垂朱闕飄颻入
綠墀郊垌既霑足黍稷有豐期百辟同憂樂萬方佇雍
熙宰臣文武百官咸有屬和

三年帝夏日與學士聯句帝曰人皆苦炎熱我愛夏日
長柳公權曰薰風自南來殿閣生微涼

宣宗雅好儒術或宰臣出鎮即賦詩以贈之詞皆清麗
昭宗天復三年三月壬寅御延喜樓餞送朱全忠還汴
帝自為詩以送之

好文

易曰觀乎天文以察時變觀乎人文以化成天下此言
觀乎天文可以察變觀乎人文可以化成也王者奉若
天時順乃人理來同區宇班政函夏風教所資文學為
始故聖明之世寤寐以求聽賦誦之聲覽駢麗之作則

欣聞想見恨不同時延鴻筆之士闢詞林之館則諷上
化下賡唱迭和蓋以潤色皇猷助成盛業故引諭之音
不絕乎耳開悟之說有益於心時既隆平物亦咸若垂
衣裳而舞干戚其漸於斯乎

漢武帝世蜀人楊得意為狗監

主天子
獵犬也

侍帝帝讀子

虛賦而善之曰朕獨不得與此人同時哉得意曰臣邑
人司馬相如自言為此賦帝驚乃召相如相如曰有是
然此乃諸侯之事未足觀請為天子遊獵之賦帝令尚

書給筆札書奏天子以為郎後相如既病免家居茂陵

天子曰司馬相如病甚可往從悉取其書若後之矣

若汝

也言汝今去已
在他人後也

所忠往

使者姓
名也

而相如已死家無遺書

問其妻對曰長卿未嘗有書也時時著書人又取去長卿未死時為一卷書曰有使來求書奏之其遺札書言

封禪事

書于札而留
之故云遺札

所忠奏焉天子異之嚴助為會稽

太守入奉計最因留侍中有奇異輒使為文

謂非常
之文

及

作賦頌數十篇

宣帝徵能為楚辭九江被公

被者人之姓也

召見誦讀益召高

才劉向張子僑華龍柳褒等待詔金馬門

華音戶化反

神爵

五鳳之間天下殷富數有嘉應帝頗作歌詩欲興協律

之事令王褒與張子僑等並待詔數從褒等放獵

放士衆大

獵也一日遊放及田獵

所幸宮館輒為歌頌第其高下以差賜帛

議者多以為淫靡不急帝曰不有博奕者乎為之猶賢

乎已

此論語載孔子之詞言博奕雖非道藝無事為之猶賢也奕今之圍碁也

辭賦大者與

古詩同義小者辨麗可喜

喜好也音辨史反

辟如女工有綺縠

音樂有鄭衛今世俗猶皆以虞說耳目

虞與娛同義

辭賦比

之尚有仁義風諭

風音訓

鳥獸草木多聞之觀賢於倡優

博奕遠矣帝又循武帝故事招選名儒俊材置左右劉

更生以通達能屬文辭與王褒張子僑等並進對

子僑官至

光祿大夫進對謂進見而對詔命也僑字或作喬或作搖皆音巨駘反

獻賦頌凡數十篇

元帝為太子時喜王褒所為甘泉及洞簫頌

喜音許史切

令

後宮貴人左右皆誦讀之

後漢光武初隗囂為西州大將軍囂賓客掾史多文學

生每所上事當世士大夫皆諷誦之故帝有所辭答尤
加意焉

班彪為竇融從事及融徵還京師帝問曰所上章奏誰
與參之融對曰皆從事班彪所為帝雅聞彪才因召入
見

明帝時賈逵明左氏傳國語為之解詁五十一篇永平
中上疏獻之帝重其書寫藏秘館時有神雀集宮殿官
府冠羽有五采色帝異之以問臨邑侯劉復復不能對

薦遠博物多識帝乃召見遠問之對曰昔武王終父之業鷲鷲在岐宣帝威懷戎狄神雀仍集此胡降之徵也帝勅蘭臺給筆札使作神雀頌拜為郎與班固並校秘書應對左右

章帝雅好文章班固愈得幸數入讀書禁中或連日繼夜每行巡狩輒獻上賦頌朝廷有大議使難問公卿辨於前賞賜恩寵甚渥東平王蒼薨詔誥中傅封上蒼自建武以來章奏及所作書記賦頌七言別字歌詩並集

覽馬後巡狩方嶽崔駰上四巡頌以稱漢德帝雅好文
章自見駰頌後常嗟歎之謂侍中竇憲曰卿寧知崔駰
乎對曰班固數為臣說之然未見也帝曰公愛班固而
忽崔駰此葉公之好龍也試請見之時楊終坐事徙北
地帝東巡狩鳳凰黃龍並集終贊頌嘉瑞上述祖宗鴻
業凡十五章奏上詔賞還故鄉

魏文帝深好孔融文辭每歎曰揚班儔也慕天下有上
融文章者輒賞以金帛

明帝青龍四年置崇文觀徵善屬文者以充之

高貴鄉公甘露二年五月辛未辛辟雍會命羣臣賦詩
侍中和逌尚書陳騫等作詩稽留有司奏免官詔曰吾
以暗昧愛好文雅廣延詩賦以知得失乃爾紛紜良用
反仄其原逌等主者宜力自今已後羣臣皆當翫習古
義脩明經典稱朕意焉又引侍中王沈及裴秀數於東
堂講讌屬文號沈為文籍先生秀為儒林文人

晉武帝雅好典籍王珣殷仲堪徐邈王恭郝恢等並以

才學文章見昵於帝

後魏孝文太和十九年車駕幸兗州召刺史崔槿赴行在所及見引喻優厚又問槿治邊之畧因及文章帝甚悅謂槿曰別卿已來倏焉二載吾所綴文已成一集今日擁旄者悉皆如此吾何憂哉

高聰為輔國將軍與賊交戰望風退敗徙平州為民行屆瀛州刺史王質獲白兔將獻託聰為表帝見表顧謂王肅曰在下郡得復有此才而令朕不知也肅曰比高

聰北徙此文或其所製帝悟曰必應然也何應更有此輩

後周明帝時宇文神舉為中侍上士帝方留意翰林而神舉雅好篇章帝每有遊幸神舉常得侍從又庾信自梁歸國帝既雅好文學信特蒙恩禮至於造膝諸王周旋款至有若布衣之交羣公碑誌多相請託唯王褒與信頗相埒自餘文人莫有逮者褒與庾信才名最高特加親待帝每遊宴命褒等賦詩談論常在左右

隋煬帝初為晉王時柳詒為諮議參軍帝好文雅招引才學之士諸葛頰虞世南王胄朱瑒等百餘人以充學士而詒為之冠帝以師友處之每有文什必令其潤色然後示人

庾自直大業初為著作佐郎自直解屬文於五言詩尤善性恭慎不妄交遊特為帝所愛帝有篇章必示自直令其詆訶自直所難帝輒改之至於再三俟稱善然後方出其見親禮如此

唐太宗時虞世南為秘書監太宗重其博物每機務之暇引之談論共觀經史外國獻獅子詔世南為之賦命編之東觀


德宗貞元四年九月癸丑賜百僚宴于曲江詔曰今日重陽卿等遊賞朕遙想歡洽欣慰良多情發於衷因製詩序今賜卿等一本仍令中書門下簡定文士三五十人應制同用清字明日內於延英門進其文武百僚及文士欲和者聽翌日百僚畢和帝考其詩以劉太真李

紆四人為上等鮑防于頎四人為次等張濛劉滋等二十二人為平等李晟馬燧李泌三人宰相不加考第文宗開成元年二月癸未宰臣奏事于紫宸殿帝曰從來文格非佳昨試進士題目是朕自出所見詩賦似勝去年宰臣李石曰陛下改詩賦格調以正顏俗高錯亦能厲精取士仰副聖旨帝曰四方表奏不典實而尚浮巧者宜罰掌書記石曰古人因事為文今人以文害事懲弊抑末實在盛時帝曰但効古為文自然體尚高遠

時又詔兵部尚書王起進文場秀句一卷九月勅秘書省及集賢院應欠書四萬五千二百六十一卷配諸道繕寫十一月又詔兵部尚書王起進國朝已來能詩人名字馮疋為太常少卿統樂立於廷帝以端凝若植問其姓名翰林學士李班奏疋之名帝喜問曰豈非能為古章句者邪遂召升階帝自吟疋送客西江詩吟罷益喜因錫以禁中瑞錦仍令大錄所著古體詩以獻尋遷諫議大夫

宣宗詔新貢舉曾於殿柱帝自題曰鄉貢進士

周世宗時扈載初為監察御史嘗遊相國寺僧院睹其
庭竹翠色可愛乃抒碧鮮賦留題於其院帝聞之命黃
門就其院錄之以進俄拜兵部員外郎知制誥



冊府元龜卷四十